

TRANSITIONE ACTIONUM:

Quam,

DEO OPT. MAX. AUSPICE,

Permissu & Decreto

Amplissimi Jureconsultorum Ordinis,

PRÆSIDE

WOLFGANG-ADAMO Lauterbach/

U. J. D. & Professore,

*Pro summis in utroq; jure privilegiis
& honoribus impetrandis,*

Ad diem Septemb:

Publico examini sistis

FRIDERICUS Rorſep/

Gustrov. Meckelb.

TUBINGÆ,

Typis JOHAN: ALEXANDRI CELLI,

ANNO M. DC. LIII.

*Magnifico, Nobilissimo, Amplissimo
& Consuliſſimo*

DN. JACOBO Steinmann /
Serenissimi ac Potentissimi Regis
Daniae Consiliario gravissimo, ejusdemque
Praefecturae Steinburgensis Administratori fide-
lissimo.

Nec non

*Plurimum Reverendo, Praclarissimo
atq; Excellentissimo,*

DN. M. HENRICO Prengern /
Dioeceseos Parchimensis & Sverinensis
Superintendenti vigilantissimo.
Item

Nobili, Strenuo ac Excellentissimo,

DN. HENRICO Steinmann / Capitaneo,
Districtuum Heiligenstedensis & Crumdicensis
Praefecto dignissimo.

Vi &

Admodum Reverendo, Clarissimo atq; Doctissimo,

DN. CHRISTIANO Prengern / coetus,
qui Borsfleti in Stormaria colligitur, Pastori meri-
tissimo.

*Dnm, Cognatis, Avunculis, Patronis & Fautoribus
suis. Parentu loco honorandū, colendū.*

Theses has Inaugurales

*Debita observantia testanda causa
submitte offert & inscribit*

AUTHOR

Quod Deus bene vertat!

PROOEMIUM.



A plerumq; hominum esse solet malitia atq; improbitas, ut non facile idipsum, quod aliis debent, ultro & bona cum gratia præstent restituantq; : sed haud rarò pro beneficio, quod acceperunt, reddant molestias, & pro pecunia inania in solutum dent verba, nihil, quo Creditor jure suo defraudari possit, omittentes. Proinde, ne singuli, nimium sæpe amantes sui, quod jus putant, id manu exequantur, prudentissimè & maximo humanæ societatis bono certa introducta sunt Juris Remedia, quibus unusquisq; ab alio sine tumultu & vi privata suum consequi & obtinere posset. Et idcirco Judiciorum vigor & publici juris tutela in medio est constituta, ne quilibet privatus sibiipsi permittere valeat ultionem. *l. 14. C. de iudicis.* Barbarorum namq; mos est ultio populorum: ideoq; Magistratus & Leges à Majoribus accepimus, ne sui quisq; sit vindex & Judex: ait Quintilianus, *declam. 12.* Et Rex Theodoricus, Hinc est, inquit, quod Legum reperta est sacra reverentia, ut nihil manu, nihil privato ageretur impulsu. Quid enim à bellica confusione Pax tranquilla distat, si per vim litigia terminantur? *Cassiodor. lib. 4. var. epistol. 4.* Vis quippe est & tunc, quoties quis id, quod deberi sibi putat, non per Judicem reposcit. *l. 13. ff. quod met. caus. gest.* Unde Divus Marcus: Optimum est, ut si quas putas te habere petitiones, actionibus experiaris. *d. l. 13.* Et Diocletianus ac Maximianus Imperatores: convenit Debitores ad solutionem urgeri Juris Remediis. *l. 9. C. de O. & A.* Appellantur autem hæc Juris Remedia ACTIONES: de quarum utilitate & præstantia multi multa passim scripserunt. Verùm vñò vendibili non opus est suspensa hedera. Et Sol non indiget candela. Ipsa enim hæc Actionum materia præ aliis tanquam pretiosissima gemma splendet atq; præfulget. *Conrad. Rittershus. ad pr. Inst. de Action.* Nec minor tamen est hujus materiæ difficultas. Et verissimum est illud Plutarchi

effatum; Difficilia quæ pulchrâ. Hinc etiam Cicero: Quid præclarum, & non idem arduum? In tota autem hac Actionum materia, siue necessitatem & præstantiam, siue utilitatem & difficultatem ejus respicias, ultimum haud obtinet locum frequentissima illa & per totum fermè Jus diffusa quæstio: An & quatenus Actiones Jure Civili in Successores transeant? Quæ de causa, illam hujus Disputationis objectum constitui.

THES. I.

Quoniam verò vocis consideratio, quæ mens ad rem ipsam melius cognoscendam præparatur, ad ipsius rei tractationem quasi janua ac via est; ideo eidem viæ insistere, ac de nomine Transitionis Actionum pauca prælibare decrevi. De Etymologia & Transitionis & Actionis hic nihil dicam; magni æstimans Aristotelis, quod habet, 2. Rhetor. monitum: Nugatorium dicere manifesta,

Prendere quæ possis oculorum lumine aperto.

Æquivocatio magis hîc mihi curæ erit. Sumitur autem nomen Transitionis, uti & verbum Transire; apud Classicos Authores, & in Jure nostro Civili, pro diverso subjecto variè; prout videre est apud Tacit. lib. 12. Annal. 26. lib. 4. Histor. 28. Agric. 6. & 38. & in l. 38. pr. ff. de minor. l. 5. §. 1. C. de temp. in integr. restit. l. 5. §. 2. ff. de præscript. verb. l. 54. ff. de evict. Quatenus de Actionibus, uti hoc in loco, prædicatur, nihil aliud significat, quam illam Actionum translationem, quæ illarum in successores activè & passivè transmittuntur atque devolvuntur. l. 43. ff. ad L. Aquil. ibi: isto modo, ne ab eo quidem, cui heres quis erit, transire ad eum actio potest. l. 26. ff. de O. & A. ibi: Omnes pœnales actiones post litem inchoatam & ad heredes transeunt. §. 1. Inst. de perper. & temp. act. circa fin. ibi: & heredibus dantur & contra heredes transeunt. l. 37. ibi: cum & ea, quæ in nominibus sunt, ad heredes transeant. ff. de A. & O. H.

THES. II.

Nomen Actionis latissimè patere vulgò notum est, ac comprehendere omnem omnino viventis operationem, quæ passioni opponitur; unde & Oratorum & histrionum & fabrorum actiones esse dicimus. Georg. Frantzke. Exerc. 13. quæst. 1. num. 1. & 2. In.

¶ 2. In Jure nostro frequenter ad usum forensem refertur, & ad Judicia restringitur; ipsaq; Juris Remedia significat, quibus cum aliquo contendimus, & jus nostrum coram superiore persequimur; quæ etiam Petitiones, Persecutiones & Judicia dicuntur. *l. 10. ff. de V. S. l. 28. ff. de O. & A. l. 1. ff. & C. famil. excise.* In hoc ipso autem significatu iterum diversimode accipitur: (1.) Istrictissimè, ita ut de omni judiciali persecutione prædicetur; sive illa Civilis sit, sive Criminalis, quæ aliàs Accusatio vocatur. *rubr. C. quand. civ. act. crim. præjud. l. 1. ff. de crim. stellion. l. ult. ff. de priv. delict. l. 1. ff. de accusar.* (2.) Ictè, ut comprehendat omnes civiles persecutiones, sive sint ordinariæ sive extraordinariæ, interdicta, præjudicia, persecutiones, & ut nunc loquimur officii Judicis Nobilis implorationes. *l. 37. ff. de O. & A. l. 34. ff. de V. S.* (3.) Strictè, pro ordinariis & in rem & in personam petitionibus, extraordinariis exclusis. *l. 178. §. 2. ff. eod. l. 25. pr. ff. de O. & A. l. 35. §. 2. l. 39. ff. de procur.* (4.) Strictissimè, ut solas denotet Actiones Personales. *l. 28. ff. de O. & A. l. 178. §. 2. de V. S. Frantz d. l.* Et in hac ultima & strictissima significatione ego quoq; Actionis vocabulum hîc accipio, ipsis Justiniani vestigiis insistent, qui omnibus ferè in locis; in quibus de hac Actionum Transitione agit, tantum personalium mentionem facit. *§. 1. I. de perp. & temp. act. l. 3. C. de hered. act.* Nam Realium Actionum transitio adeo difficilis non est; siquidem activè æque ac alia jura realia ad heredes & similes successores transmittuntur: passivè verò non juris successorem, sed possessorem rerum sequuntur, & quodammodo contra rem ipsam diriguntur. *l. 19. ff. de jur. fisc. l. 25. ff. de O. & A. l. 2. C. de hered. act. l. 2. C. si unus ex plur. hered.* Hinc Paulus Jctus, *si in rem actum sit*, inquit, *quamvis heres possessoris, si non possideat, absolvatur.* *l. 42. ff. de R. V.* Proinde libellus Actionis-Realis, qui in heredem tantum concipitur, omisâ possessionis mentione, tanquam ineptus rejicitur. *Oldendorp, class. 3. act. 2. num. 5.*

THES. III.

Potest autem hæc Actionum Transitiio ita breviter delineari: quòd sit modus ipsas Actiones personales in Successores universales transferendi. Et à Dd. vulgariter dividitur

in Activam & Passivam. Activa dicitur, qua Actiones Creditoribus competentes in illorum successores transferuntur. Passiva verò vocatur, qua Actiones contra Debitores competentes adversus illorum heredes & similes successores quoq; devolvuntur.

THES. IV.

Hæc Actionum Transfatio, quamvis ex Jure communi originem trahere videatur; quo sicuti ad successores transeunt bona, ita & bonorum onera: *Gros. lib. 2. de jur. bell. & pac. cap. 13. num. 17.* ab Imperatoribus tamen partim Legibus XII. Tabularum, partim aliis Juris Civilis speciebus adscribitur. Sic Imp. Diocletianus & Mâximianus, *Creditores hereditarios*, inquit, *adversus legatarios non habere personalem actionem* convenit: quippe cum evidenter Lex XII. Tabularum heredes huic rei faciat obnoxios. l. fin. C. de hered. act. Et in l. 26. C. de Pass. Passio successorum debitoris, ex Lege XII. Tabularum as alienum hereditarium pro portionibus quas singulis ipso jure divisum, in solidum unum obligare creditori non potest. Idem legitur in l. 6. C. l. 25. §. 13. ff. famil. hercisc. l. 10. C. de jure delib. De Transfatione activa extat rescipitum Antonini Imperatoris in l. 1. C. de except. Debitores quidem hereditarii unicuique heredum pro portione hereditaria antiqua lege, b. e. XII. Tabul. obligati sunt. Agitur namq; hoc in loco non absolutè de Actionum Transfatione; sed in specie & definitè secundum leges & mores Romanorum; quibus illa non tantum approbata, sed & certis limitibus circumscripta & propriis qualitatibus induta est; cujus respectu non minus quàm patria potestas, tutela, & similia, Juris Civilis dici poterit.

THES. V.

Multi, etiam magni nominis Jcti, hujus Transfationis, præsertim passivæ, causam proximam esse arbitrantur quasi Contractum, per hereditatis aditionem inter heredes & Creditores hereditarios præsumptione & fictè initum. arg. §. 5. 1. de oblig. quas. ex contr. Hinc frequentissima est apud Dd. Regula: Heres Creditoribus hereditariis ex quasi contractu obligatur. Verùm quæ mea hac de re sit sententia breviter dicam. Creditorum hereditariorum appellatio latè patet, ita ut etiam comprehendat legatarios & fideicommissarios; l. 42. ff. de O. & A. quos si Doctores

res intelligant, verissima erit illorum regula, utpote ab ipso Imperatore tradita, *in d. §. 5. l. de obl. qua quasi ex contr. & l. §. 2. ff. de O. & A.* Verum illa heredis obligatio, quâ legatariis & fideicommissariis adstringitur, ad hanc tractationem non pertinet; quippe heredi imponitur non per Transitionem, sed per novum obligandi modum. Incipit enim illa obligatio in herede; *d. l. 42. ff. de O. & A.* neq; in persona defuncti radicata fuit; & per consequens ab illo in Successorem transire non potuit; adeo ut ille quasi contractus, qui inter heredem & legatarios initus dicitur, nullâ ratione hujus Transitionis causa dici possit. Si verò Dd. in dicta regula intelligunt hereditarios Creditores propriè ita dictos, qui jus contra defunctum habuerunt radicum, uti nostra Transitiô requirit; illam falsam esse, nullus dubito. Nam ipsa non tantum omni Juris textu destituitur; sed certissimis quoq; Juris principiis est contraria. Leges siquidem, quas illius Regulæ defensores adducunt, loquuntur de herede & legatariis ac fideicommissariis, qui cum defuncto nihil contraxerunt. *d. §. 5. Inst. de oblig. qua quasi ex contr. d. l. §. 2. ff. de O. & A.* Et quod ille quasi Contractus, de quo *in dd. l.* agitur, ad Creditores hereditarios non pertineat, exinde quoq; apparet, quod hisce Creditoribus contra heredes non competat Actio ex testamento, quæ ex illo quasi contractu nascitur: sed illæ ipsæ actiones, e. g. depositi, commodati, empti, locati, pro socio &c. quæ contra defunctum locum habebant, etiam adversus heredes dantur. *l. 12. l. 49. ff. de O. & A. l. 7. §. 1. ibi: datur actio depositi in heredem. ff. deposit. l. 63. §. 8. ibi: in heredem quoq; socii pro socio actio competit. ff. pro soc.* Ex quo suæ sponte fluit, heredem ex illis causis obligatum esse, ex quibus defunctus fuit obligatus. Nam ex fructu cognoscitur arbor. Præterea si heredes etiam creditoribus hereditariis ex dicto quasi contractu obligarentur, omnes actiones contra heredem competentes essent stricti juris. Etenim ille quasi contractus & exinde descendens Actio sua natura est stricti juris, *arg. l. §. junct. l. 7. ff. de eo quod cert. loc.* Tandem quod hujus Transitionis causa non sit quasi contractus, propria ipsius natura demonstrat. Nam Contractus, & veri & quasi, sunt modi obligationes constituendi; quibus novæ obligationes introducuntur & constituuntur: non verò modi acquirendi & jura jam constituta transferendi. Transitione autem

autem Actionum non novæ producuntur Obligationes & Actiones; sed jam constitutæ de persona in personam transferuntur. Alia itaq; hujus Transitionis querenda est causa.

THES. VI.

Nos autem veram & proximam hujus Transitionis causam esse existimamus Additionem hereditatis, & similes succedendi atq; per universitatem acquirendi modos. Nam per Hereditatis additionem heredi acquiritur Hereditas, ipsi vel Testatoris voluntate, vel Legis dispositione delata. Hereditas verò est totum aliquod collectivum, quod omnia defuncti jura, activa & passiva, commoda & incommoda comprehendit. *l. 24. de V. S. l. 62. de R. I. l. 3. pr. ff. de bonor. poss.* Proinde eo ipso, dum heres hereditatem acquirit, simul etiam omnia defuncti jura, activa & passiva, commoda & incommoda, quæ in hereditate continentur, in heredem transeunt; adeo ut ipse quoad jura illa in defuncti locum succedat, ejusq; personam repræsentet, & cum defuncto una eademq; persona esse dicatur. *Nov. 48. in præfat. ibi: cum utiq; nostris videretur legibus, unam quodammodo esse personam heredem, & ejus qui in eum transmittit hereditatem.* Unde ita argumentor: Quodcunq; est causa transitionis ipsius hereditatis, illud etiam est causa transitionis actionum. Actiones enim, uti dictum, tanquam partes continentur in hereditate, & sic cum ipsa hereditate transeunt. Atqui hereditatis aditio est transitionis hereditatis vera & proxima causa. *§. fin. l. de hered. qual. & differ. l. 1. l. 21. §. 1. l. 1. ff. de A & O. H.* Ergo hereditatis aditio est etiam causa hujus Actionum transitionis. Quod ipsum etiam clarissimi Juris textus probant. Sic in *l. 22. ff. d. t. Nam ut quis*, inquit Paulus Jctus, *pro herede gerendo obstringat se hereditati.* &c. Et Africanus, in *l. 49. eod.* *Pupillum etiam eo tutore auctore, qui tutelam non gerat, hereditatem adeundo obligari ait.* Eodem sensu Ulpianus: *Hereditas (scilicet per additionem acquisita) quin obliget nos ari alieno* (quod in hereditate tanquam pars continetur, & cum hereditate per additionem in heredem transit,) *etiamsi non sit solvendo, plus quàm manifestum est. l. 8. ff. d. t.* Quodcunq; verò in heredibus extraneis operatur hereditatis aditio, illud etiam efficiunt in suis & aliis successoribus, suorum existentia cum secuta immixtione, bonorum posses-

possessionis agnitio, adrogatio, & similes per universitatem acquirendi modi.

THES. VII.

Æquitas, quæ est hujus Transitionis causa impulsiva, quoad transitionem activam & Successores Creditoris, deduci potest ex iis, quæ tradit Grotius lib. 2. de jur. bell. & pac. capit. 7. num. 3. & ex l. 1. C. de SS. Eccles. Quoad passivam, ipsa fundatur in analogia & æquabili commodorum & incommodorum mixtura, quam naturalis ratio commendat. Hinc Paulus Jctus: *Secundum naturam est, commoda cujusq; rei eum sequi, quem sequuntur incommoda.* l. 10. ff. de R. I. & vice versa, Ad quem commoda pertinent, ad eundem retro spectant & onera; & onus à commodo regulatur. *Jacob. Gothofred. ad d. l. 10. ff. de R. I.* Neque ferendus est is, qui lucrum quidem amplectitur, onus verò ei annexum contemnit. *l. unic. §. 4. C. de caduc. tollend.*

THES. VIII.

Subjectum in quod Actiones per hanc Transitionem devolvuntur sunt Successores; qui vel sunt Vniversales, vel Singulares. Dicuntur autem Vniversales, qui una acquisitione, in rem universalem; Singulares verò, qui in res singulares succedunt. *l. 24. §. 1. ff. de damn. infect. l. 1. §. 13. ff. quod legat. Vinn. ad §. fin. l. per quas pers. cui. acquir. num. 1.* Res autem universalis sive rerum universitas est nomen civile, significans quid universum compositum ex multis singulis, nec minus ex oneribus & incommodis vel ære alieno, quàm commodis & ære suo. *l. 3. pr. ff. de bon. poss. l. 37. ff. de A. & O. H. Aegid. Hortens. ad §. si quis una. 9. l. de fideicommiss. hered.* Res verò singulares hinc dicuntur, quæ per se solæ ac separatim absq; commodis & incommodis aliis ad eundem hominem spectantibus aut relatis considerantur. *Dn. Iohann. Otto Tabor in partit. Element. Jur. part. 2. thes. 17.* sive, ut laudatus Hortensius d. l. loquitur: *Nomen rei singularis naturale est, neq; res naturaliter designata detrimentum recipit; nisi naturale, id est, cum res naturaliter aut casu sit deterior; puta, si servus legatus, corpore vel animo peius habere cœperit: neque verò incrementum nisi item naturaliter, puta, si ancilla pepererit. Caterum civiliter aut extrinsecus nihil recipit,*

puta, neque detrimentum ab aere alieno, neque incrementum ab eo, quod hereditari debetur. Ex quo statim apparet, Singulares Successores ad hanc tractationem non pertinere. Quia non sunt successores Juris, universi scilicet, l. 9. §. 1. ff. de edendo. Ipsi enim, ut dictum, tantum succedunt in res singulares, quæ ab aliis authoris juribus separatæ sunt, nec ejusdem obligationes, quæ personæ adhærent, & ex quibus actiones personales descendunt, comprehendunt; & per consequens cum rebus illis singularibus, in illarum successores, personales actiones transire nequeunt. Hinc si quis hereditatem à se aditam vendiderit; Actiones personales hereditariæ directæ nec activè nec passivè, in emptorem hereditatis transeunt. l. 5. C. de hered. & action. vend. Etenim ad hunc emptorem tantum transeunt res singulares, quæ specialiter ipsi traditæ sunt; vide l. 6. C. de hered. & action. vendit. nec universitas rerum, quæ defuncti fuit, & per additionem hereditatis cum patrimonio venditoris confusa est, ad hunc emptorem transfertur. arg. d. l. 6. l. 2. l. 5. C. eod. Emptio siquidem est modus obligandi, non verò modus universitatem bonorum transferendi. Unde Imperator Antoninus: *Quamvis enim ea lege emerit, (scilicet emptor hereditatis, de hoc enim loquitur) ut creditoribus hereditariis satisfaciatur: excipere tamen actiones hereditarias inivitis cogi non potest.* l. 2. C. de hered. vel action. vendit. Nam certi Jure nostro introducti sunt modi, quibus res universales transferuntur; sine quibus successores universales constitui nequeunt. Adeò ut licet quis aliis modis hoc facere tentaverit, illud ipsum tamen efficere haud possit. Sic legatum est modus particularis, quo res singulares acquiruntur: princ. l. de legat. licet itaque quis bonorum vel hereditatis partem legaverit; quod fieri posse constat ex l. 23. l. 26. §. 2. de leg. 1. l. 39. pr. ff. de vulg. & pupill. substit. Legatarius tamen non fit juris & universalis successor; arg. d. l. 26. §. 2. de leg. 1. proinde actiones hereditariæ nec activè, nec passivè in eum transeunt: l. ult. C. de hered. action. ob quam causam factum, ut stipulationes partis & pro parte inter hujusmodi legatarium & heredem interponerentur. §. sed quia, §. in fin. de fideic. hered. ubi Bachov. & ad princ. l. de legat. num. 1. Neque dictis adversantur ultima d. l. 5. de hered. vel action. vend. verba, quæ hæc sunt: *quamvis utiles etiam adver-*

ſus debitorum hereditarios actiones emptori tribui placuit. Etenim utiles illæ actiones à venditore in emptorem non tranſeunt, nec emptori per modum tranſitionis, de quo hîc agimus, acquiruntur; ſed à lege ex æquitate dantur. d. l. 5. arg. l. 7. C. de hered. vel act. vend. l. 1. §. 13. ff. de tur. & rat. diſtr. l. 16. pr. ibi: Nam ex quo reſcriptum eſt à Divo Pio utiles actiones emptori hereditariæ dandas. ff. de pact. Hoc tamen hîc prætereundum non eſt, Actiones perſonales, quæ in rem ſcriptæ vocantur, quia rem ſequuntur, & ſub qualitate vindicationis inſtituuntur, l. 9. §. fin. l. 14. §. 3. ff. quod met. cauſ. Bach. ad Treuſl. vol. 2. diſp. 25. th. 5. lit. E pag. mihi 705. etiam cum re ſingulari adverſus ſucceſſorem ſingularem tranſire. d. l. 9. §. fin. & l. 17. §. 3. ff. d. r.

THES. IX.

Univerſalium Succeſſorum diverſæ ſunt ſpecies. Juſtinianus in Inſtitutis quatuor nobis demonſtrat; nimirum 1. Heredem, 2. Bonorum Poſſeſſorem, 3. Arrogatorem, & 4. Cui libertatum conſervandarum cauſa bona addiſta ſunt. §. fin. l. per quas perſon. nob. acq. Tertius in ordine viventi, reliqui deſunctis ſuccedunt. Primum locum tenet Heres, qui jure civili directo in univerſum jus & locum deſuncti, vel ex teſtamento, vel ab inſtato jure hereditario ſuccedit. l. 9. §. 1. ff. de edend. l. 34 ff. de judic. l. 11. ff. de diverſ. & temp. præſcrip. Actiones autem in ipſum & active & paſſivè tranſire, textus iidemq; clariſſimi ſunt in l. 37. ff. de A. & O. H. ubi Pomponius, Heres, inquit, in omne jus mortui, non tantum ſingularum rerum dominium ſuccedit, cum & ea, quæ in nominibus ſint, ad heredem tranſeant. l. fin. C. de hered. act. l. 13. C. de hered. inſtit. adeo ut licet hereditas ſolvendo non ſit, adverſus heredem tamen tranſeant actiones: l. 8. pr. ff. de A. & O. H. niſi Inventarium conſecerit; tunc enim actiones in quantum vires hereditatis excedunt, novo jure, exceptione repelluntur. l. fin. C. de jur. deliber. Nov. 1. cap. 2.

THES. X.

Veniunt autem Heredis appellatione non tantum primi & proximi heredes; ſed etiam ulteriores, heredum heredes, & qui deſuncto per ſucceſſionem quamvis longiſſimam heredes ſunt. l. 194. de R. l. l. 65. l. 70. de V. S. nec ullum eſt dubium, quin etiam

in remotiores successores actiones gradatim transcant. De Herede in re certa, v. c. fundo Tusculano, instituto, quid statuendum sit, paucis videamus. Primò autem in genere dicimus, Heredem in re certa institutum, qua talem, ad hujus transmissionis subjectum non pertinere, & in illam actiones nec activè, nec passivè transire. Ipse enim, qua talis, non universalis, sed tantum particularis successor, & legatarii loco est; per textum expressum in *l. 13. C. de hered. instit.* Verùm ut hæc generalis regula commodius intelligatur, distinguendum est: an Heres in re certa institutus solus in testamento scriptus sit, nullosq; habeat coheredes; an verò etiam alii simul heredes simpliciter vel ex certa parte instituti sint? Priori casu transcant quidem actiones in heredem in re certa institutum, verùm non qua talem; sed quatenus ipse est universalis successor & in universum jus defuncti succedit: Nam cum nemo in paganis pro parte testatus, pro parte intestatus decedere possit. *l. 7. ff. de R. I.* & testator hoc in casu testamentarium heredem habere voluerit; ea propter, rei mentione potestate juris detracta, perinde habetur, quasi simpliciter heres scriptus esset, ita, ut ipse in universum defuncti jus succedat, *l. 1. §. 4. l. 9. §. 13. ff. de hered. instit. l. 41. §. fin. ff. de vulg. & pupil. subst.* & per consequens, in ipsum quoq; tanquam verum heredem actiones transcant. Hinc si plures, in certis rebus v. c. Titius ex fundo Tusculano, Sempronius ex fundo Corneliano, instituti fuerint, etiam si duo illi fundi diversi sint pretii, & singulis, Titio nimirum Tusculanus, & Sempronio Cornelianus officio Judicis attribuitur; æs tamen defuncti alienum ipsi æqualiter agnoscere tenentur, & in quemlibet actiones pro dimidia parte transcant. Quippe ex æquis partibus, quasi sine partibus scripti, succedunt, & fundos vice perceptionis accipiunt. *l. 35. pr. & §§. seqq. ff. de hered. instit.* Posteriori casu, si coheredes hereditatem adjerint, heres in re certa institutus legatarii loco habetur, & tantum rem illam singularem consequitur. Cessat enim hîc ratio, propter quam superiori casu rei mentio detrahitur. Testator enim hoc in casu tantum testatus decedit; siquidem coheredes in universum jus defuncti succedunt; ut propterea in illos quoq; tantum actiones transcant. *l. fin. C. de hered. action.* Atq; hic est casus, qui in *l. 13. C. de hered. instit.* proponitur, & dicto modo deciditur, pro ut ex ipsis *d. l. 13. verbis.*

bis apparet, quæ hæc sunt: Quoties certi quidem ex certa re scripti sunt heredes, vel certis rebus pro sua institutione contenti esse iussi sunt, quos legatariorum loco haberi certum est: alii verò ex certa parte, vel sine parte, qui pro veterum legum tenore ad certam unciam institutionem referuntur: eos tantummodo omnibus hereditariis actionibus uti vel conveniri decernimus, qui ex certa parte vel sine parte scripti fuerint, nec aliquam deminutionem earundem actionum occasione heredum ex certa re scriptorum fieri. vid. Bachov. vol. 2. ad Treutl. diff. 14. th. 10. lit. K. Cæterum si coheredes hereditatem non adierint, res perinde habetur, ac si heres, qui ex re certa institutus est, ab initio solus scriptus sit; unde in totam hereditatem succedit, & tanquam verus heres & successor universalis rectè hereditariis actionibus conveniri & agere potest. Sicbard. ad d. l. 13. C. de hered. instir. num. 6. Mich. Graß. lib. 1. recept. sentent. in §. hereditas. quest. 3. & §. Institutio. quest. 22. num. 2. & seqq. Bachov. vol. 2. ad Treutl. diff. 12. th. 1. lit. A.

THES. XI.

Si plures simpliciter, vel ex certis partibus instituti, omnes hereditatem adierint; actiones in ipsos quidem transeunt, verum regulariter non in solidum, sed in singulos pro hereditaria portione; l. 1. C. si cert. pet. l. 1. C. de except. l. 6. C. famil. herisc. adeo ut hoc ipsum heredes debitoris, quo minus singuli pro portione hereditaria conveniantur, pacto, invitis creditoribus, mutare non possint. l. 26. C. de pact. Exceptiones tamen, quibus singulis heredibus actiones & activè, & passivè in solidum dantur, vide in l. 25. §. 9. 10. & seqq. ff. famil. herisc. l. 3. §. 3. ff. Commod. l. 1. & 2. C. si unus ex plurib. hered. l. 85. ff. de Verb. Obligat. vide etiam l. 1. §. 36. ff. deposit. l. f. C. cod. Miles, si alium castrensiarum rerum, alium cæterarum scripserit heredem, quasi duorum hominum dux intelliguntur hereditates. Hinc etiam actiones, quæ ad bona castrensia pertinent, & æs alienum, quod in castris contractum est, transit ad solum castrensem heredem. Reliquæ verò actiones ad heredem paganum devolvuntur. Si tamen unus ex illis propter æs alienum adire recuset, alter, qui adiit, totam agnoscere tenetur hereditatem, & omnibus creditoribus respondere. l. 17. §. 1. ff. de testam. milit.

THES. XII.

Ad exemplum militis, etiam Vassalli duos saepe heredes, unum allodialium, *Land. Erben* / alterum feudaliū *Erb. Erben* / relinquere solent; hinc frequentissima in foro est quaestio: quæ actiones in hunc, quæ verò in illum transeant? Hæc autem quaestio non minus difficilis quàm frequens & utilis, imprimis de Transitione passiva agitur; an & quatenus actiones dentur adversus successores feudales? Ad cujus illustrationem & decisionem, maximè necessaria est magistralis illa Feudi divisio, qua illud in Hereditarium & Feudum ex pacto & providentia dividitur. *Berlich. part. 2. concl. 55. num. 1.* ubi expressè docet, quod nemo ex perplexa illa quaestione sese explicare possit, nisi qui probè naturam feudi hereditarii & ex pacto & providentia noverit. Nam hæc ipsa Feudi divisio secundum veriorē sententiam dependet à diversa succedendi ratione. *Vult. lib. 1. Feud. cap. 8. num. 25. Struv. Exercit. Feud. 4. thes. 12. in pr.* quæ etiam quoad nostram materiam diversos producit effectus. Etenim in hereditario Feudo, *Erb. Erben* / successio fit secundum modum succedendi civilem, ita ut quoad modum succedendi sese habeat ut res hereditaria seu allodialis, & successor in illud succedat jure hereditario civili, cum qualitate hereditaria, & non ex providentia juris feudalis, sed ex juris communis dispositione. *Berlich. part. 2. concl. 55. num. 10. 18. & plurimi ibid. alleg. Bachov. ad Treutl. vol. 2. d. 12. th. 4. lit. B. fere in fin. Vult. lib. 1. de feud. d. c. 8. n. 26. Struv. d. l. Bened. Carpzov. part. 2. Jurispr. forens. const. 47. def. 1. num. 19. & 10. ibi:* ut feudum hereditarium immutata primi feudi natura, quoad successionem & ejus effectum pro re hereditaria reputetur, atque aded in ipso feudo ab herede jure hereditario succedatur, & ita feudum idem corpus & patrimonium inseparabile fiat cum ceteris rebus hereditariis. Jure autem civili, quicumque jure hereditario in alterius locum & jus succedit, ille non potest non succedere simul etiam in defuncti jura passiva & in æs alienum, per jura præced. thes. allegata. Unde communiter & rectissimè docent Dd. Actiones adversus successorem Feudi Hereditarii transire, ipsumque ad æs alienum defuncti teneri. *Georg. Schult. Synops. feudal. cap. 8. num. 160. Berlich. dist. part. 2.*

part. 2. concl. 55. num. 20. & seqq. ubi plures hujus sententia adducit ampliaciones Struv. exerc. feud. 14. thes. 2. Nihilque refert siue filius, siue agnatus in hoc feudum succedat; quippe uterque; jure hereditario civili succedit, & Vasalli heres est, in quem transeunt omnia defuncti jura & actiones; adeò ut licet agnatus reliqua bona Vasalli allodialia repudiare, & feudum tantum retinere velit, per hoc ipsum tamen ab actionibus hereditariis & ære defuncti alieno sese liberare haud valeat. Sicut enim nemo unam hereditatis partem agnoscere, alteram verò repudiare potest. l. 1. & 2. ff. de O. & A. H. ita quoque bona allodialia hoc in casu à feudo hereditario separari, & illis repudiatis, hoc retineri nequit. Nam hereditarium feudum pars hereditatis esse censetur. Bened. Carpz. d. def. 1. num. 10. Vult. de feud. lib. 1. cap. 9. num. 114. Gail. 2. obs. 154. num. 10. & 18. Bacbov. d. th. 4. lit. B. Berlich. d. l. num. 4. Myns. 3. obs. 69. num. 1. & seqq.

THES. XIII.

In feudo ex pacto & providentia, cum successio fiat non secundum modum succedendi civilem, sed feudalem ex pacto primi acquirentis & providentia juris feudalis, jure sanguinis à primo acquirente descendens; proinde in hoc feudo transitio actionum ex Jure Civili regulari nequit, sed ad feudorum consuetudines recurrendum erit. Ad illas itaque respicientes distinguendum putamus, inter debita feudalia, & hereditaria siue allodialia. Berlich. *part. 2. concl. 55. num. 33.* ubi testatur, hanc distinctionem consuetudine receptam esse. Illa etiam hujus feudi successorem ex generali consuetudine sequuntur. Nec quicquam refert, ipse filius, siue agnatus sit; siue in allodialia quoque successerit, siue non. Berlich. *d. conclus. 55. num. 35. & 79.* Nec ferendus est is, qui lucrum quidem amplectitur, onus autem ei annexum contemnit. Carpz. *part. 2. l. F. const. 46. def. 7. Georg. Schulz. synops. feud. cap. 8. num. 164. Georg Adam Struv. exerc. feud. 14. th. 4. Dn. Ioh. Otto Tabor de oblig. success. in offic. cap. 5. num. 22. in fin. & 23.* Quæ autem talia onera & debita sint, & qualis inter illa sit differentia, de eo vide Berlich. *d. concl. 55. num. 36. Carpzov. d. const. 46. def. 8. & seqq. Georg. Schulz. d. cap. 8. num. 165. Struv. d. exerc. 14. th. 5. & seqq.* Quod attinet:

net debita civilia hereditaria sive allodialia, quæ etiam onera Vassalli dicuntur, Doctores communiter distinguunt inter feuda nova & antiqua. In illorum successores æs defuncti Vassalli alienum, & actiones ad illud exigendum competentes transire, probant *arg. c. unic. 2. Feud. 45. Hart. Pistor. lib. 2. quest. 4. num. 25. Berlich. d. conclus. 55. num. 85. Iohann Borcholt. de feud. cap. 9. num. 239. Carpz. d. const. 46. des. 4. num. 7. & 8. Struv. d. Exerc. thes. 27.* Quoad feudum Antiquum, interest, an Successores feudi illius simul sint heredes in allodialibus, an verò non. Priori casu, in illos omninò transeunt actiones, ipsique creditoribus hereditariis, quatenus heredes sunt, tenentur. *d. c. unic. 2. feud. 45. Iohann Otto Tabor. d. cap. 5. num. 22. Berlich. d. conclus. 55. num. 86. Schulz. d. c. 8. num. 201. Dn. Struv. d. exerc. thes. 28.* Posteriori casu, si successor feudi, heres non sit, & feudum tantum retineat, debita hereditaria solvere non obligatur, nec actiones adversus illum transeunt. *d. c. unic. 2. Feud. 45. Ioh. Otto Tabor d. l. Berlich. d. l. num. 81. & Dd. communis.* Caterum inter Filium & Agnatum ipsius Vassalli, de jure feudali hæc est differentia; ut hic quidem feudum solum retinere, & hereditatem Vassalli repudiare possit; ille verò filius, ob honorem patri debitum, quo mediante in feudo succedit, utrumque vel retinere vel repudiare teneatur. *d. c. unic. 2. Feud. 45. Bened. Carpzov. part. 2. const. 47. des. 3. Berlich. p. 2. conclus. 56. num. 13. Sigism. Finckelthaus diffus. feud. 6. thes. 22. Bachov. vol. 2. disp. 12. thes. 4. lit. B. Tabor. d. l. num. 22. Struv. Exerc. feud. 9. th. 11. Dn. Ludw. Synop. jur. feud. cap. 10. pag. 266. Dn. Schnobel. disp. feud. 7. th. 27.* Quapropter, cum filius feudi successor regulariter quoque sit heres, ipsum etiam regulariter patris æs alienum agnoscere & exsolvere oportet. *d. c. unic. Dn. Carpz. part. 2. Const. 46. des. 5. vid. omninò Struv. exercis. feud. 14. th. 29.*

THES. XIV.

Relicto successore feudali, redeamus ad heredem allodiale, in quem hereditariæ actiones ita transeunt, ut licet heres hereditatem aliis restituere rogatus sit, illamque etiam restituerit, ipse tamen heres maneat, ac proinde stricta jûris ratione actionibus hereditariis experiri & conveniri possit; §. 3. *l. de fideicomm. hered. l. 88. in fin. ff. de hered. instir.* sed post Scutum Trebellianum

num sine effectū. Quamvis enim etiam factō jam SCto Trebelliano, Heres, qui ex fideicommissō restituit hereditatem, non desinat esse heres, & directæ actiones penes illum maneant, nec in fideicommissarium transferantur: *d. l. 88. in fin. l. 7. §. 10. in fin. ff. de minor. l. 70. pr. ff. ad SCtum Trebellian. arg. l. fin. ff. de transact.* dicto tamen SCto hoc effectum est, ut heres agens exceptione hereditatis restitutæ repelli, & conventus alios eadem repellere possit. *l. 1. §. 4. l. 27 §. 7. ff. ad SCtum Trebell.* Ei verò, cui restituta est hereditas, & in eum, tanquam heredi & in heredem actiones utiles dantur; *§. 4. l. de fideicommiss. hered. l. 18. §. ult. ff. ad L. Falcid.* quæ cum directis ejusdem sunt potestatis, eundemque habent effectum. *l. antepen. §. 1. ff. de negot. gest.* Atque hæc omnia vera sunt & procedunt, si totam hereditatem, aut integram suam portionem, heres restituerit; (spontè, an coactus nihil refert) *§. 7. l. de fid. hered. l. 16. §. 7. l. 45. ff. ad SCr. Trebell. Bach ad Tr. v. 2 d. 14. thes. 9. lit. C. & D. in pro.* Cæterum si non tota hereditas, sed tantum ejusdem pars restituta fuerit, & ipse quoque fiduciarius partem retinuerit, actiones hereditariæ pro rata portione apud heredem cum effectū manent; ac pro altera parte fideicommissario & in eum dantur; *d. §. 7. l. 1. C. ad SCr. Trebell.* quod secus est, si heres certa re vel summa deducta hereditatem restituere rogatus sit; tunc enim, æquè ac in priori casu, fideicommissario & in eum in solidum dantur actiones: fiduciarius verò, quoad effectum similis est heredi in re certa instituto, cujus coheredes hereditatem adierunt. *§. 9. l. de fideic. hered. l. 30. §. 3. ff. ad SCr. Trebell. Hillig. ad Donell. Enucl. lib. 7. c. 28. lit. B. in med. Dn. D. Schnobel. ad ff. disp. 8. thes. 14.*

THES. XV.

Ex quatuor supra enumeratis Successoribus Universalibus primum & præcipuum, Heredem nim: consideravimus. Succedit nunc secundus, Bonorum Possessor; qui Prætoris beneficio in universum jus & locum defuncti succedit, *l. 3. pr. ff. de bon. poss. l. 13 pr. ff. de bon. poss. contr. tab.* & passim Successor honorarius vocatur. *l. 24. §. 1. ff. famil. hercisc. l. 9. §. 6 de interrog. l. 10. ad SCr. Vellei. l. 1. §. 8. ut leg. nomin. cav.* Cum enim Lex XII.

C

Tabul.

Tabul. nimis angustis finibus successiones coarctasset, ac propterea homines saepe numero sine successoribus morerentur: Prator æquitate motus, suas partes interposuit, & dilatatis Juris Civilis angustis constituit, ut hi, qui illo jure ad bona defuncti pervenire non poterant, ex benignitate tamen Juris Prætorii postea ad successionem admitterentur; non quidē ad hoc, ut hereditatē acquirerent, sed ut bonorum possessionem saltem nanciscerentur, & cum subtilitate Juris heredes fieri non poterant, fiant tantum bonorum possesores. Nam Prator heredem facere non poterat; per legem enim vel similem juris constitutionem heredes fiunt. *pr. Inst. de bon. poss.* Quod etiā elegantissimē probat Ulpianus, in *fragm. tit. 28. §. 11.* Hi, inquit, quibus ex successorio edicto bonorum possessio datur, heredes quidem non sunt, sed heredi loco constituuntur beneficio Prætorii. Hæc autem Bonorum Possessio etiā est res universalis, sive rerum universitas, quæ commoda & incommoda, & omnia defuncti jura, activa & passiva complectitur, *l. 1. & d. l. 3. ff. de bon. poss.* viq; ipsa nihil aliud est, quā hereditas; & hereditatis nomine continetur. *l. 138. ff. de V. S. l. 1. §. 7. ff. ad SCt. Trebell.* Quicumq; itaq; illam consequitur, non minus rectē, quā heres, universalis successor dicitur, & ad subjectum nostræ Transitionis refertur. Etenim quicumq; in universum jus succedit, heredis loco est, & cum herede æquo jure censetur, pariq; passu cum eo ambulat. *l. 128. §. 1. de R. I.* Unde in specie Ulpianus, in *omnibus causis*, inquit, vice heredum bonorum possesores habentur. *l. 2. ff. de B. P.* & Paulus: Prator bonorum possesorem heredi loco in omni causa habet. *l. 117. de R. I.* Idem legitur in *l. 13. pr. de bon. poss. cont. tab. ibi*: Omne enim jus transferri æquum est, quod per causam hereditariam scriptus heres nanciscitur, ad eum, quem prator heredi loco constituit. Proinde actiones hereditariæ sine omni dubio æque in bonorum Possesorem, ac in heredem, activē & passivē transeunt. Quod expressis quoq; verbis docet Ulpianus in *l. 10. ff. ad SCt. Vellej.* dicens: Hæ actiones & hereditibus, & in heredes, & perpetuo competunt, ceteris quoq; successoribus honorariis dabuntur, & adversus eos.

THES. XVI.

Sequitur nunc tertius Successor Universalis, Arrogator; qui patrēfamilias, liberorum loco in familiam legitimē assum-

psit.

pfit. Nam qui se arrogandum dat, cum capite fortunas quoq; suas, i. e. omnia, quæ habet, transfert ad patrem adoptivum, *l. pen. §. 2. ff. de bon. poss. secund. tab. l. 15. pr. ff. de adopt.* adeo ut actiones etiam & nomina transeant in illum sine ulla celsione. *§. 1. Inst. de acquis. per arrog.* Quæ omnia dependent ex antiquo jure patriæ potestatis. Sed postquam illud in parentibus naturalibus immutatum est; etiam ad Arrogatores, ne fictio veritate sit fortior, illam ipsam mutationem Impp. extenderunt; constituentes, ut arrogati quoq; castrensia & quasi castrensia pleno jure, adventitia verò proprietate retineant; patri vero tantum ususfructus cum potestate administrandi cedat. *§. 2. l. cod. l. 4. §. 2. ff. de castr. pecul.* adeo ut jure novo omnia arrogati jura & actiones in arrogatorem non transeant: sed ipse tantum tanquam legitimus peculii adventitii administrator filii nomine & consensu, si ipse pubertate major, conveniri & agere possit. *§. 3. l. de acquis. per arrog. arg. l. 2. §. 3. C. de bon. qua liber.*

THES. XVII.

Quartus Successor universalis, & postremus inter eos, qui propositi sunt in *§. ult. l. per quas person.* est is, cui bona defuncti libertatum conservandarum causa addicta sunt. Etenim si in testamento vel codicillis libertates data fuerint, & nemo neq; ex testamento, neq; ab intestato hereditatem adjerit; ne libertates, quarum in jure favor est maximus, pereant, *arg. l. 9. ff. de testam. tutel.* & bona cum defuncti ignominia à creditoribus possideantur & distrahantur; D. Marci constitutione factum est, ut servi, qui à Domino acceperunt libertatem, si bona sibi addici velint, audiantur. *t. r. l. de eo cui liberr. caus. bon. addis. l. ult. C. de test. manum.* Qua additione facta, ipsi bonorum possessori assimulantur. *l. 4 §. antepen. ff. de fideicom. liberr.* atq; in eos actiones, sed utiles tantum, creditoribus dantur. *l. 3. ff. d. r.* Verùm de hoc ipso frustra disputamus, cum illius hodie apud nos usus sit nullus. *Georg. Schulz. ad d. r. Inst. in fin.*

THES. XVIII.

Et hætenus de quatuor illis Universalibus Successoribus, qui in Institutionibus recensentur. Reliquos Juris libros evolventes, quintum offendimus, Fiscum, vel bona ob delictum publi-

publicata, vel vacantia occupantem. Sunt quidem, qui Fiscum, præsertim in bona vacantia succedentem, ad primum Universalem Successorem referunt; existimantes ipsum jure hereditario bona ita acquirere, & verum heredem esse, ac propterea non diversum Universalem successorem constituere. *Valent. Riemer. decad. 8. quest. ult.* Sed ab hac sententia recedunt Peregrin. *de Jure Fisci lib. 5. tit. 1. num. 60. & seqq. Bachov. ad Tr. vol. 2. d. 16. Th. 1. lit. F. Borchols. tr. de gradi. cap. de success. Fisci. pag. 264.* doctes: Fiscum prædictis in casibus bona occupare non jure hereditario, sed superioritatis jure. *per cap. unic. 2. Feud. 56.* Unde etiam in jure nostro ad ordines heredum ab intestato succedentium non refertur, sed potius heredibus opponitur Fiscus bona vacantia occupans. Atq; hanc sententiam, quam latius defendit Peregrinus, *d. l.* quoad occupationem bonorum publicatorum, concedit etiam Valent. Riemer *d. l.* atq; quoad occupationem bonorum, quæ vacantia dicuntur, quorum scilicet dominus sine herede decessit, pro prima sententia acriter pugnat, varia ac speciosa adducendo argumenta; quæ tamen ad veritatis solem collata, haud durare, sed colliquescere videntur. Nam quod Dn. Riemerus tanquam palmarium affert ex *l. 51. § fin ff. de fidejuss.* fiscum scilicet indistinctè conferri cum herede: suo modo quidem concedimus; sed consequentiam negamus; nec exinde statim sequitur fiscum proprie esse heredem, & jure hereditario in bona vacantia succedere. Sic videmus quod bonorum possessor indistinctè confertur cum herede in *l. 2. ff. de B. P.* & tamen bonorum possessor proprie heres non est, sed saltem quoad effectum heredis loco habetur. *pr. 1. eod.* quod ipsum adhuc pluribus aliis exemplis, si tempus hoc permetteret, demonstrari posset. Nulla itaq; in hoc argumento subest ratio consequentiæ. Cum heres & fiscus tantum quoad effectum in *all. l. 51. § fin* comparentur. Comparata autem non sunt eadem. Et si adducta ratio adhuc quicquam concluderet, sequeretur, fiscum etiam bona damnatorum, ut heredem occupare, & jure hereditario in illis succedere. Expresse enim *d. l.* de bonis publicatis loquitur. quod tamen ipse Riemerus & alii dissidentes inficiantur. *d. quest. ult. Hillig. Donell. Enucle. lib. 9. c. 1. lit. S. ibi: Quando autem bona ob delictum alicujus confiscatione transferuntur, non est heres, sed heredi loco.* Porro pro confu-

confirmanda hac sua sententia Dn. Riemerus tale necit argumen-
 tum: *Fiscus bona vacantia occupans succedit in iuribus activis & pas-*
sivis. l. 2. C. ad l. Iul. de vi. l. 5. C. de bon. proscript. Iura verò hac
sunt certa heredis nota. l. fin. C. de hered. act. E. hoc in casu fiscus est
proprie dictus heres. Verùm si hæc in majori adducta ratio vim
 concludendi habet, quid obstat, quò minus eo etiam in casu,
 ubi bona damnatorum occupat, fiscus propriè heres dici possit:
 cum tam hoc, quàm illo in casu actiones in fiscum transferantur.
 Et insuper d. ll. non de bonis vacantibus; sed de bonis damnato-
 rum fisco vindicandis expresse loquantur. Deniq; nec ultimum Dn.
 Riemi argumentū adeo firmo stat talo, ut nullo modo everti pos-
 sit. Nam licet fiscus utatur hereditatis petitione, *per l. 20. §. 6.*
ff. de hered. petis. Inde tamen certò colligi haud potest, fiscum
 verè esse heredem, & hereditario jure succedere. Ipse enim Ul-
 pianus *in all. l. 20. §. seq. 7.* expresse asserit, hoc SCtum, non so-
 lum si vacantia bona fisco vindicantur; sed etiam si ex alia quacun-
 que causa bona ad fiscum pervenerint, locum habere. Quapro-
 pter si hoc Riemi argumentum quicquam probat, infallibiter
 quoq; sequitur, de occupatione bonorum publicatorum idem esse
 dicendum; quod ipsum Dissidentes uno quasi ore constanter ne-
 gant. De reliquis Dn. Riemi rationibus atq; fundamentis in
 conflictu videbimus. Quamvis autem ex prædictis jam satis ap-
 pareat, fiscum neq; priori, neq; posteriori casu heredem propriè
 dictum esse, nec illum jure hereditario in bona vacantia succedere;
 tamen quoad effectum heredis loco habetur, *l. 128. §. 1. de R. I.*
 & post agnitionem bonorum ei & in eum, pro portione & quanti-
 tate ad ipsum delata, actiones transeunt. *l. 3. §. 5. l. 17. §. 5. ff. ad*
SCr. Trebell. l. 6. ff. de jur. fisc. l. 1. C. de fidejuss. l. 51. pr. ff. solut. ma-
tr. l. 2. C. cod. l. 9. §. 6. ff. de tut. & rat. distr. d. l. 2. C. ad l. Iul. de
ripubl. vel priv. & d. l. 5. C. de bon. proscript. Gail. 2. obs. 86. num. 6.
 & seqq. Dn. Carpz. *l. F. part. 4. const. 1. def. 16.* Pari enim jure
 fiscus in his bonis utitur, quo is usus erat, cui successit. *l. 3. §. 7.*
l. 6. pr. ff. de jur. fisc. Peregrin. *d. l. 5. cap. 1. num. 53 & seqq.* Hoc
 tamen communiter Dd. addunt, Fiscum ultra vires bonorum oc-
 cupatorum non teniri. *per l. 1. §. 1. l. 11. ff. d. t. Borchols. d. 22. de*
gradib. pag. 265. Fachin. lib. 6. contrav. cap. 21. in pr. Vinn. ad §.
fin. l.

fin. 1. per quas person. cuiq; acquir. Latius hoc persequitur Peregrinus lib. 4. tit. 3. num. 25. & d. l. 5. tit. 1. num. 64.

THE 2. XIX.

Denique certis collegiis universitas bonorum, sine herede defuncti, ex speciali privilegio conceditur. *s. t. C. de hered. Decurion. quæ etiam heredum locum obtinent. arg. l. 128. §. 1. de R. I. & proinde recte ad nostræ Transitionis subiectum referuntur. Tandem ad Successores universales pertinere dicitur Monasterium; quod universa bona illorum, qui illud ingrediuntur, ipso jure acquirit. Nov. ss. cap. 5. auth. ingressi C. de ss. Eccles. cum auth. seqq. Vinn. ad d. §. fin. 1. per quas person. num. 2. Et hæc hæctenus de Successoribus; in quos actiones tam activè quàm passivè transeunt.*

THE 3. XX.

Veniamus ad nostræ Transitionis Objectum: quod constituunt Actiones personales. Supra enim dictum est, nos hic tantum de mere personalibus acturos esse Actionibus, relictis Realibus, & quæ cum illis aliquam habent cognationem, in rem scriptis. Quæ autem Actiones personales in Successores transcant, illud imprimis dijudicandum est, ex causa harum Actionum remota, quæ diversa est. Omnes siquidem Actiones Personales oriuntur ex Obligatione: Ipsa autem Obligatio descendit vel ex facto licito, vel illicito. Factum licitum est vel Pollicitatio, vel Conventio. Pollicitatio legitima, sponte nimirum Deo vel Reipublicæ ob causam facta, obligationem & exinde Actionem producit; quæ non tantum locum habet contra ipsum pollicitatorem, sed etiam transit adversus ejus heredes; *l. 2. §. fin. ibi: voti enim obligationem in heredem transire constat. l. 14. ff. de pollicit.* nisi Pollicitatio facta sit ob honorem; & promissor, antequam illum inierit, re adhuc integra, denatus fuerit: *l. 11. ff. eod. Wesenbec. in paras. ff. d. t. num. 5.* Reliquis in casibus, heredes quoque tenentur; ita tamen, ut interdum in illorum persona locum habeat diminutio: puto, si facta sit non ob honorem, sed aliam ob causam; & in bonis defuncti non sit, unde promissa præstentur. *l. 6. pr. l. 9. ff. h. t.* Tunc enim Extranei heredes tantum in quintam, & liberi in decimam patrimonii defuncti

functi partem tenentur. *d. l. 9.* Ceterum si ob honorem quis aliquid promiserit, illumque inierit, etiam ejus heredes in solidum sine diminutione conveniri, & ab illis promissum tanquam as alienum exigere potest. *l. 3. pr. l. 6. pr. d. l. 9. pr. ff. de pollicit.* At si promissor, antequam susceperit honorem, decesserit, uti dictum, extinguatur obligatio; nisi opus promissum jam fuerit inchoatum; quod heredes quoque vel adimplere & perficere, vel extranei quintam, liberi verò decimam hereditatis partem exsolvere tenentur. *d. l. 14. ff. eod.*

THES. XXI.

Alterum factum licitum, ex quo obligationes efficaces & actiones oriuntur, est Conventio sive Pactum & quidem Jure Civili, non Nudum sive ~~actum~~ vestitum. Nudum enim pactum ad actionem producendam Jure Civili non proficit. *l. 5. §. 2. ff. de solut. l. 10. C. de pact. l. 27. C. locat. l. 3. C. de rer. permut. l. 7. §. 4. ff. l. 13. C. de pact.* Moribus autem nostris etiam ea pacta, quæ de Jure civili Nuda dicuntur, actiones producere, tradit & testatur *Wesemb. in paratit. ff. de pact. num. 9. Bocov. ad l. 23. ff. de R. l. cap. 1. num. 73. & 74. Dn. Carpzov. Jurispr. forens. p. 2. const. 32. def. 10. num. 9. & 10. Henric. Hahn ad Wesemb. tit. de pact. num. 9.* Unde quaeritur, an Actiones moribus nostris ex nudis pactis descendentes etiam heredibus & in heredes competant & dentur? Quod nos omninò affirmandum esse censemus. *arg. §. 1. Instit. de perpet. & temp. action. Haersoldt de Action. part. 1. act. 14. num. 10.*

THES. XXII.

Pactum non Nudum jure civili dicitur, quod ad actionem producendam efficax est: idque vel ex se & sua natura & vocatur Contractus; vel ex coherencia contractus, ut pactum contractibus adjectum; vel ex assistentia legis, puto pactum legitimum. Actiones quæ ex pacto legitimo oriuntur & activè & passivè transcunt in heredes. Exemplum habemus in actione constitutæ pecuniæ, quæ omninò in heredes transit. *l. 1. l. 2. pr. C. de const. pecun.* Item actio quæ datur ex donatione & heredibus donatarii & in heredes donatoris competit. *leg. 35. in fin. & ibi Gothofred. C. de donat.* adeo ut licet in ipsa inter vivos donatione nulla facta fuerit heredum mentio, donatarius tamen ante do-

naturem mortuus nihilominus actionem sibi competentem ad successores suos transmittit. *arg. l. 9. ff. de probat. Bened. Carpov. part. 2. l. F. const. 12. defin. 21. Et lib. 5. tit. 7. Respons. 55. num. 7. ubi num. preced. 6. docet*, mortis causa donationem ad heredem non transire. Quod verum est, si ante donatorem decesserit donatarius. Cæterum si hic ultimo loco mortuus fuerit, quin actio ejus heredi ad rem mortis causa donatam exigendam etiam competat, nulli dubitamus. Adversus autem donatoris heredis actio in tantum datur, ut ipsi in solidum jure conveniantur, nec quicquam ratione alimentorum deducere possint. *l. 41. in fin. princ. ff. de Re Jud.* Privilegium siquidem competentia, quod defuncto donatori competeat, personale est & in heredes non transit. *l. 24. l. 25. ff. d. t. l. 63 §. 2. ff. pro soc. l. 12. & l. 13. ff. solut. matrim.* Ex pactis contractibus adjectis eadem oriuntur actiones, quæ ex contractibus, quibus adjecta sunt, quorumq; pars esse censentur, descendunt. *l. 6. §. 1. ff. de act. empt. l. 11. C. de pact. l. 4. pr. ff. de leg. commiss. l. 16 ff. de in diem addict. Bachov. ad Treurl. vol. 1. disp. 6. Thes. 10. lit. C. & in comment. ff. tit. de pact. rubr. de pact. adject. num. 6. Frantzk in Comment. ad ff. tit. de contrah. empt. num. 409.* Idem itaq; dicendum est de his, quod de actionibus ex contractibus venientibus in sequenti. thes. dicemus.

THESES. XXXIII.

De Actionibus, quæ ex Contractu veniunt; hanc constituo Regulam: Actiones ex contractu descendentes regulariter & active & passive in successores transeunt. *per l. 12. l. 39 ff. de O. & A. §. 1. Inst. de perpet. & temp. act.* ubi particula Aliquando regulam præsupponit contrariam: quod ipsum confirmatur exemplo actionis Commodati, *l. 3. §. 3. ff. commod. Depositi, l. 1. §. 19. l. 7. §. 1. l. 9. l. 14. l. 25. pr. ff. deposit. l. 8. l. fin. C. eod. Sequestraria, l. 12. §. 2. ff. de pos. Pignoraticia, l. 10. C. de pign. act. Empti Venditi, l. 47. l. 52. §. 1. ff. de act. empt. vend. Locati, l. 24. l. 29. l. 34. C. locat. ex Literarum obligatione, l. 8. C. de non numer. pecun. Scipulatione, l. 2. §. 1. l. 85. de V. O. etiam tacita & ficta, l. unic. §. 4. C. de rei uxov. act. l. 2. C. solut. matrim. Fidejussione, §. 2. Inst. de fidejuss. l. 4. §. 1. ff. l. 24. C. eod. &c.* Atq; hæc regula vera est & procedit non tantum in Actionibus quæ ex veris, sed etiam quæ

quæ ex quali contractibus proveniunt. d. l. 39. ff. de O. & A. c. g. Heredes & agere & conveniri possunt actione negotiorum gestorum, l. 3. §. 7. ff. de negot. gest. l. 6. l. 7. l. 17. C. cod. condictione indebiti, &c. l. 12. ff. de condict. indeb. Etiam si ipsi contractus personales, & morte contrahentium extincti fuerint; actiones tamen, quæ ex illis jam natæ sunt, in heredes transeunt. v. c. Societas, Tutela, Cura, solvitur & finitur morte; nec in heredes transit: Actio verò pro Socio, l. 35. l. 36. l. 63. §. 8. ff. pro soc. & Tutelæ heredibus & in heredes datur. l. 1. §. 16. & 17. l. 7. ff. de tut. & rat. distr. l. 3. §. fin. ff. de contrar. tut. l. 4. ff. de fidei. & hered. tutor. l. fin. C. cod. l. 17. C. de negot. gest. Vide tamen l. 1. C. de hered. tut. & cur. d. l. 17. Dn. Bened. Carpz. l. F. part. 2. const. 11. desin. 35. Nec interest etiam si in contractu nulla heredum facta fuerit mentio. l. 38. pr. ff. de V. O. arg. l. 9. ff. de probat. l. 13. C. de contrah. stipul. Dn. Carpzov. d. p. 2. const. 20. des. 1. num. 1. Bachov. ad Tr. vol. 2. disp. 28. th. 5. lit. B. in pr. Ut proinde clausula heredum mentionem faciens, in contractibus, quoad hunc effectum, ut nimirum actio in illos transeat, supervacua esse videatur. l. 56. §. 1. ff. de V. O. Quæ enim tacite insunt, si expresse adiiciuntur, nihil operantur. arg. l. 3. de leg. 1. l. 3. C. de fideiuss. Gail. 2. obs. 2. num. 10. Barbosa. loc. comm. locupl. lib. 14. cap. 1. axiom. 5. in fin. & alii ibid. alleg. Imò harum actionum transiitionem nec per particulam taxativam contrahentis personæ adjectam impediri, docet post Tiraquell. de retr. convent §. 1. gl. 2. num. 12. & gl. 6. n. 2. & seq. Bachov. ad Treutl. vol. 2. d. disp. 28. th. 5. lit. B. pag. m. 943. in fin. Dn. Carpz. p. 2. const. 20. des. 2. per l. 8. §. 4. ff. de pignor. action. Hinc Dn. Scabini Lipsienses: Ob num gleich in der Burgschafft verschreibung die Burgen allein sich Verpflichtet / und der Erben ausdrücklich nicht gedacht worden / etc. So sein doch gleichwol die Erben nichts desto weniger in Burgschafft zur Zahlung verbunden. apud. Dn. Carpzov. d. des. 2. Præterea extenditur hæc regula, ut ex contractibus venientes actiones, etiam ob dolum defuncti in successores, & quidem in solidum, dentur. l. 12. l. 49. ff. de O. & A. l. 7. §. 1. ff. de pos. l. 157. §. 2 ff. de R. I. & ibi Jacob Goshofred. Et quamvis nonnulli hanc ampliatiōem restringant ad bonæ fidei contractus: Wessenb. ad §. 1. Instir. de perp. & temp. act. num. 3. Borholt. ibid. num. 6. & 7. Jacob. Goshofr. ad l. 152. §. 3. ff. de R. I. Verius tamen nobis

videtur contrarium; hanc nimirum ampliacionem etiam ad stricti juris actiones pertinere. Generaliter siquidem scribit Ulpianus, in l. 49. ff. de O. & A. *Ex contractibus venientes actiones in heredes dantur, licet delictum quoque versetur.* Et in d. l. 157. §. 2. ff. de R. I. *In contractibus successores ex dolo eorum, quibus successerunt, non tantum in id quod pervenit, verum etiam in solidum tenentur:* h. e. unusquisque pro ea parte, qua heres est. Nec dubitandum, si promissor dolo malo v. c. hominem occiderit, heredem ejus in solidum teneri. arg. l. 23 ff. de V. O. Bachov. tr. de Action. disp. 5. thes. 4. pag. 168. Hinc Papinianus in l. 121. §. fin. de V. O. ex facto. Rei promittendi, *doli stipulatio heredem ejus tenet, sicut ex ceteris aliis contractibus, veluti mandati, depositi.* Neque hisce resistit quod Ulpianus in d. l. 12. & l. 49 ff. de O. & A. tantum bonae fidei actiones enumeret. Etenim unius inclusio non statim est exclusio alterius. Et exempla non restringunt, sed tantum illustrent regulam. Nec negotium nobis facessit d. l. 152. §. ult. ff. de R. I. ubi Ulpianus, *in contractibus, inquit, quibus doli praestatio vel bona fides inest, heres in solidum tenetur.* Nam bona fides ibidem non accipitur oppositivè ad jus strictum; sed quatenus opponitur dolo, fraudi, & significat dictorum veritatem & constantiam, quae in omnibus contractibus necessaria est. l. 4. C. de O. & A. l. 31. ff. de pos. l. 59. §. 1. & mandat. ita ut illius l. 152. §. ult. de R. I. haec sit sententia. In contractibus, utpote in quibus bona fides praestari, h. e. omnia candidè dici & dicta constanter servari atque impleri, omnisque dolus & fraus abesse debent, heredes quoque in solidum tenentur. Alia nostrae regulae ampliatio habetur in l. 47. ff. de act. empr. vend.

THESES. XXIV.

Sed limitatur praedicta Regula: Primò, si aliud inter partes conventum fuerit, ne scilicet actiones in heredes & similes successores transeant. Tunc enim actiones ipso jure quidem transeunt in heredes, verum sine effectu; eliduntur siquidem exceptione pacti; quae heredibus conventis competit, agentibus verò obstat. l. 56. §. 4. ff. de V. O. §. 3. Inst. eod. l. 44. §. 1. ff. de O. & A. Et ita accipienda sunt ea, quae tradit Dn. Carpzov. part. 2. l. F. const. 20. desin. 2. num. 1. & seqq. Andr. Gail. 2. obs. 2. num. 19. in fin. Hoc ipsum autem à fidejussoribus actum censetur,

zur, si conventum fuerit, ut, si unum è fidejussoribus mori contingat, in ejus locum alium substituatur debitor. Anton Hering. de fidejuss. cap. 20. §. 11. num. 60. Matth. Coler. de process. execut. part. 1. cap. 10. num. 319. Wesenb. part. 1. Consil. 14. num. 85. quos sequitur Dn. Carpzov. d. const. 20. defin. 5. ubi hanc sententiam tali confirmat præjudicio. Dieweil aber dennoch die Verschreibung außdrucklichen dahin gerichtet / wann einer von den Bürgen mit tode abgehen würde / daß also denn der Schuldener an dessen stelle einen andern gewissen Bürgen verschaffen solle / etc. So mögen auch obbemeldte Erben / vielberührten ihres Vatern Bürgschafft halber / von euch beständiger weise nicht belanget werden. Secundò limitatur d. Regula ratione objecti, quod personalibus actionibus petitur: si nimirum illud tale sit, quod à debitoris heredibus præstari, aut in heredes creditoris transire non possit. c. c. Actio qua agitur ad consequendum usumfructum promissū, datur quidem adversus promissoris heredes, sed ad heredes creditoris non transit. Sicuti enim ususfructus morte usufructuarii extinguitur: §. 3. Inst. de Vusufr. l. 3. §. fin. ff. quib. mod. usufr. amit. ita etiam actio personalis, quæ ad illum petendum competit, morte creditoris tollitur. l. pen. pr. C. de Vusufr. Item si factum promissum personæ adhæreat & specialiter industria promissoris electa sit. vid. l. unic. §. 9. C. de caduc. tollend. l. 31. ff. de solut. Gail. 2. obs. 2. num. 19. Tertiam exceptionem indicat Imperator in §. 16 Instit. de perp. & temp. act. hisce verbis: Aliquando tamen etiam ex contractu actio contra heredem non competit; veluti (hanc particulam Cujacius, Pacius & Frantzkus auctoritate quorundam Codicum delendam censent: quod tamen Vinnio necessarium non videtur. vid. Riemer. decad. 14. quæst. 2.) cum testator dolose versatus sit, & ad heredem ejus nihil ex eo dolo pervenit. Sunt, qui hæc verba generaliter accipiunt, de omnibus actionibus ex contractu, in quo defunctus admisit dolum: sed malè, propter l. 12. & l. 49. ff. de O. & A. l. 7. §. 1. ff. depos. l. 157. §. fin. ff. de R. l. Frantzk. in Comment. ff. rit. depos. num. 105. Riemer. d. loc. Quas autem actiones Justinianus hic intelligat, de eo non omnium eadem est sententia. Nobis illorum placet opinio, qui illas hic excipi arbitrantur actiones, quæ quidem ex

28
Depositi obligatio
contractu proveniunt, verum ob delictum concurrens ex parte
penales habentur, eò quod factum puniunt & in dolum conce-
ptæ sunt. quod satis evidenter confirmant verba d. l. 7. §. 1. ff.
depos. quæ hæc sunt: *Quamquam enim aliàs ex dolo defuncti non
solumus teneri, nisi pro ea parte, qua ad nos pervenit: tamen
hic dolus ex contractu, NB rei que persecutione descendit, id-
eoque in solidum unus heres tenetur; plures verò pro ea parte,
qua quique heres est.* Talis autem esse censetur actio Tribu-
toria, quæ dolum malum domini coercet malitiosè in distribu-
endo versati, l. 7. §. 2. ibi: *qua actio dolum malum coercet domini.*
l. 8. ff. de tribut. act. Bachov. de action. disp. 5. thes. 4. Huc etiam
communiter Dd. referunt actionem depositi miserabilis sive ne-
cessarii, h. e. tumultus, incendii, naufragii, vel ruinæ causa fa-
cti; quippe quæ adversus depositarium, qui dolosè versatus est
in retinendo vel abnegando tali deposito datur in duplùm, ad-
versus verò heredem in simplum; unde respectu dupli dici po-
test, hanc actionem in heredem non dari in solidum; quatinus
negari non possit, hoc exemplum non satis quadrare ad id, quod
d. §. 1. dicitur. quia etiamsi nihil pervenerit, in simplum tamen
adversus heredes competit. l. 1. §. 1. l. 18. ff. deposit. Bachov. d.
disp. 5. th. 4. Vinn. ad d. §. 1. Inst. de perp. & temp. act. num. 7.
ubi ad has actiones etiam refert actionem in factum adversus fal-
sum tutorem: verum hanc actionem non ex contractu, sed ex de-
licto esse, docet Wesenb. in parat. ff. quod fals. tut. aut. gest.
esse dic. num. 4. & ibi Bachov. Et hæc impræsentiarum dixisse
sufficiant de Actionibus, quæ ex facto licito descendunt. Ordo
jam afflagitat, ut accessum moliamur ad Actiones venientes ex fa-
ctis illicitis, quæ uno vocabulo dicuntur Delicta.

THESES. XXV.

Delicta verò in specie sic dicta, nihil aliud sunt, quàm fa-
cta illicita, immediatè extra ullius conventionis considerationem,
contra legis prohibitionem spontè admissa, quibus quis vel ad ali-
quid patiendum vel præstandum adstringitur. l. 4. & l. 25. §. 1. ff.
de O. & A. Dn. Struv. Exercit. ad ff. 39. th. 1. Et hæc sunt vel
Publica, vel Privata. Publica iterum sunt vel verè Publica,
vel quasi Publica, & dicuntur Popularia. Delicta verè pu-
blica.

blica sunt, quæ ob damnum Reipublicæ illatum legibus publicorum Judiciorum vindicantur, l. 1. ff. de publ. judic. potestate accusandi regulariter cuivis de populo concessa; §. 1. Inst. de publ. judic. l. 43. §. 10. ff. de R. N. ut proinde frustra de hujusmodi Accusationis transiitione quærat. Cum ipsa non in bonis sit, nec ad privatum Accusatoris interesse tendat: sed ad publicam vindictam, etiam heredibus, ex propria persona, & jure Civitatis, quatenus ejusdem Reipublicæ cives sunt, competat, atq; per consequens cum bonis ad successores transire nequeat: Perez. in Cod. tit. si reus vel accus. mort. fuerit. num. 1. Adeo ut licet à defuncto Accusatio instituta & lis contestata fuerit, ipsa tamen Accusatoris morte aboleatur, l. 3. §. fin. ff. de accus. l. 10. pr. ff. ad SCt. Turpill. l. fin. C. si reus vel accusat. mort. ita, ut si heres vel alius illam restaurare velit, novo processu, libello novo & subscriptione opus sit. l. 3. §. fin. ff. de accusat. Bachov. ad Treutl. vol. 2. disp. 31. th. fin. lit. D. vers. morte accusatoris. Sicuti autem hæ accusationes activè non transeunt in successores: ita nec passivè adversus illos etiam inchoatæ & ceptæ accusationes regulariter transmittuntur; Cum crimen morte Rei cum pœna extingatur. l. 3. l. 5. l. fin. C. si reus vel accus. mort. l. fin. ff. ad L. Iul. Majest. l. 3. l. 6. ff. de publ. judic. Aliquando tamen etiam post mortem Rei cognitio criminis peragitur, ad hunc effectum, ut bona fisco vindicentur, vel ab heredibus turpia lucra extorqueantur, aut pœnæ pecuniariæ exigantur; de quibus ut pluribus agamus, prohibet instituti nostri & temporis ratio. Supra enim dictum est, nos hic acturos esse de transiitione actionum in strictissima significatione acceptarum. De hisce autem accusationibus respectu successorum, vid. Bachov. ad Tr. d. vol. 2. disp. 31. th. ult. lit. D. Bened. Carpz. in crimin. part. 3. quest. 131. num. 1. & seqq. Perez. & Pac. in Codic. tit. si reus vel accus. mort. fuerit. Farinac. prax. crim. lib. 1. tit. 1. quest. 10.

THES. XXVI:

Delictis verè Publicis succedunt delicta quasi Publica sive Populæria; ex quibus oriuntur Actiones Populares, quæ suum jus Populo tuentur, l. 1. ff. de pop. act. ac regulariter quoq; cuilibet de populo competunt. Publicæ namq; utilitatis quivis de populo vindex esse debet. Cum tamen plures agere volent, Prætor eligere solet magis idoneum, vel eum cujus maxime interest. l. 2. & l. 3.

§. 1. ff. eod. Sunt enim hæ actiones duplicis generis: in quibusdam privatus aliquis interesse suum habet; in quibusdā non habet: In illis semper præfertur is, cuius interest: d. l. 3. §. 1. ff. d. l. 5. §. 5. ff. de his qui effud. vel deiec. l. 3. pr. l. 6. ff. de sepulcr. viol. hæ verò omnibus æqualiter propositæ sunt, unde etiam unicuique e populo hac actione experiri permissum est. In heredes autem vel successores hæ actiones ante litem contestatam non transeunt; quod tam ex parte Actoris, quam Rei verum est. l. fin. ff. de pop. act. l. 5. §. 5. vers. quæ autem ff. de his, qui effud. vel deiec. Actoris successoribus hæ actiones propterea non dantur: quia in bonis ipsius non fuerunt ante litem contestatam, l. 32. pr. ff. ad L. Falcid. juncta l. 12. pr. ff. de V. S. Ergo nec cum bonis illius transmitti potuerunt. Et quavis nonnulli reperiantur textus, in quibus dicatur, quod etiā actiones populares heredi similibusq; competant: prout hoc expressè affirmatur de actione, qua agitur adversus eum, qui eo in loco, quo vulgo iter fieri solet, aliquid positum aut suspensum habet, quod potest, si ceciderit, alicui nocere, in d. l. 5. §. ult. ff. de his qui effuder. Item de actione sepulchri violati, in l. 10. ff. sepul. violat. attamen hoc non ita accipiendum, ac si ipsæ actiones in illos jure hereditario transirent, vid. d. l. 5. §. 5. sed heredibus competunt non jure hereditario sed jure Civitatis, quatenus ejusdem Rei publicæ cives sunt; aliis tamen præferuntur, si illis, quorum intererat, successerunt, quia heredes sunt. Oldendorp. clas. 6. act. 20. num. 4. M. Lyclama lib. 3. benedict. cap. 15. & cap. 17. in pr. Dn. Frantz. in comment. ad ff. tit. de his, qui effud. num. 6. A parte Rei propterea Actiones Populares ante litem contestatam in successores non transeunt; quia hæ actiones pœnales sunt, & quidem ex delicto. d. l. 5. §. 5. in med. ff. eod. Jam verò nullæ actiones, quæ ex delicto oriuntur, & præsertim pœnales, ante litem contestatam in successores transeunt; §. 1. Inst. de perp. & temp. act. l. 1. pr. ff. de privat. delict. quod in sequentibus pluribus demonstrabitur. Nec hanc nostram adserptionem infringit l. unic. §. 10. ff. ne quid in flum. publ. ubi dicitur, quod actio ex hoc interdicto competat adversus heredes ejus, qui impedit, vel facit aliquid in flumine, quo aliter aqua fluat, quam priori ætate fluxit. Nam patet ex præcedenti §. 9. d. l. quod hæ actio tantum adversus illum detur, qui denegat, vel facit ut aliter aqua flueret; Si itaq; successores & heredes

redes pergant, continuare prohibitionem fluxus, & ipsi nunc quod impediant, quò minus aqua ita flueret, quam priori ætate factum, illi hac actione non jure successionis & quatenus succedunt primo prohibenti, sed ex proprio facto & delicto, quatenus scilicet ipsi etiam hujus criminis reos se constituerunt, conveniri possunt. *Oldendorp. d. claf. 6. act. 18. num. 5.* Tantum etiam de Actionibus, quæ ex delictis Publicis proveniunt.

THESES. XXVII.

Sequuntur Actiones ex delictis privatis descendentes. Dicuntur autem delicta privata, quæ in privatam personam committuntur, nec legibus publicorum judiciorum, & à quocunq; de populo, sed privata & civili actione ab eo, ad quem res principaliter pertinet, vindicantur. Transito autem harum quoque actionum consideratur vel respectu Creditoris activè, vel respectu Debitoris, quæ à Dd. quavis parum commode, Passiva dicitur. Quoad Creditore & ejus Successores distinguendum est, An actiones competant pro rebus ablatis recuperandis, & vindicandis delictis, quibus aliquid ex patrimonio fuit ademptum; an verò proditæ sint pro vindicandis injuriis, personis illatis. *Bachov. in not. ad VVesemb. xi. ff. de in jus vocand. n. 8. Dn. Iohan. Otto Tabor. racemat. crim. i. th. 59.* Prioris generis actiones activæ h. e. in Creditoris heredes & similes successores transeunt. *l. 1 §. 1. ff. de privas. delict. §. 1. Inst. de perp. & temp. act.* Cujus rationem hanc assignat Bachovius, *tr. de Action. disp. 5. th. 5.* quoniam, inquit, per delictum (tale nimirum) de bonis defuncti aliquid diminutum est: & cum adeo bona minora alterius facto pervenerint ad heredes, meritò ipsis heredibus actio in ipsum Reum dari debet. Cum etiam hic cesset ratio, de mera personalitate obligationum ex delicto, quæ impediatur representationem in persona heredis Rei: quæ representatio in persona hereditum Actoris sive Creditoris commode locum habet. cum nec rationis sit ut propter mortem alterius, delinquentis conditio melior fiat. Proccedit autem hæc sententia, sive actiones per litis contestationem in Judicium fuerint deductæ, sive non. *d. §. 1. Inst. de perp. & temp. act.* Sive rei persecutoria; ut actio rerum amotarum, *l. 21. §. 5. ff. rer. amor.* de alienatione judicii mutandi causa facta, *l. 4. §. fin. ff. de alienas. jud. mut. caus. fact.* sive mixta; i. e. partim pœnales, partim rei persecutoria; ut actio L. Aquiliae, *l. 23. §. 8. ff. ad L.*

ad L. Aquil. vi bonorum raptorum, l. 2. §. fin. ff. vi bon rapt.
doli, l. 13. pr. ff. de dol. mal. quod metus causa; l. 16. §. 2. ff. quod
met. caus. sive merè pœnales sint, ut furti. d. l. 1. §. 1. ff. de priv.
delict. l. 47. ff. de furt §. 1. Inst. de perp. & temp. act. Nam & pœ-
nales actiones in bonis computantur, & propterea cum aliis bonis
ad heredes & similes successores transeunt. l. 32. pr. ff. ad L. Fal-
cid. Contrarium, actiones nimirum pœnales heredibus non dari
tradit Antonius Faber in Rational. ad l. 4. ff. de Calumn. quod
etiam probare videtur Wesenb. in π. ff. tit. de in jus vocand. num. 8.
item tit. ne vñ fiat ei, qui in pos. num. 4. in quibus, & aliis locis con-
cludit, actionem heredibus non dari, quia pœnalis sit, quos eo no-
mine acriter reprehendit Bachov. in not. ad VVesenb. d. 1. de in jus
vocand. Et quamvis Wesenbecius ea excusari possit ratione, quod
ipse Ulpianus eodem modo ratiocinetur in l. 3. §. 5. ff. de hñ, qui
effud. vel dejec. & rationes Jctorum quoq; non semper ab univer-
sali concludant. vid. Dn. Iohan Otto Tabor ad VVesenb. diss. 4. quest.
3. & in Racemat. crim. 1. tb. 58. H. Hahn. ad VVesenb. tit. de in jus
vocand. num. 8. verb. nec heredi. Verissima tamen est prædicta no-
stra Regula, & ejus, quoad pœnales actiones, ampliatio, per jura
& exempla supra adducta; quam etiam agnoscit Wesenb. π. ff. de
privat. delict. num. 4. & tit. ne quis eum, qui in jus vocat. num. 4.
ferè in fin. Neq; illam destruit l. 4. ff. de Calumniar. ubi actio in
factum de calumniatoribus, heredibus competere negatur, sed
illis dati repetitionem sufficere dicitur. Etenim exceptio non im-
pugnat regulam; sed illam potius in casibus non exceptis confir-
mat. Multi autem illam actionem referunt ad posterioris generis
actiones, quæ dantur ad vindicandam injuriam personis illatam.
Bachov. ad π. VVesenb. tit. de calumn. num. 4. lit. b. ibi: quia est ad
vindictam, & aliquatenus similis actioni injuriarum: ceteroquin a-
lias actiones, licet pœnales, heredibus damnum passis, dari, supra
probavimus: ideoq; ratio Wesenb. num. 4. in fin. quod actio sit
pœnalis, recta non est. Verùm re penitus considerata, hoc ex-
emplum ad hanc potius classem pertinere videtur. Datur enim hæc
actio ob tale delictum, quo ut plurimum damnum bonis nostris est
illatum; unde ipsa quoque (unico casu excepto) ad mixtas re-
fertur actiones, quæ partim pœnæ, partim verò rei persecutorix
sunt. l. 5. §. 1. ff. de calumniar. Aliam d. Regulæ exceptionem
vide

vide in l. 9. in fin. ff. de relig. & sumpt. funer. ubi actio in factum, quæ datur illi, qui prohibitus fuit inferre mortuum in eum locum, in quo ei jus inferendi competebat, heredibus & successoribus dari negatur. Cujus rationem Jctus ibidem non addit; sed ipse miratur, quod hæc actio heredi & successori non detur. Nec ab Interpretibus alia affertur ratio, quam quod ita Legislatori placuerit. Unde Gothofredus ad d. l. 9. & Vulteijs, ad § 1. Inst. de perpet. & temp. act. existimant, in all. l. 9. exemplum contineri l. 20. ff. de Legib.

THES. XXVIII.

Posterioris generis Actiones, quæ nimirum pro vindicandis injurijs personis illatis competunt, ante litem contestatam morte injuriam passi extinguuntur, nec in heredem transmittuntur. Dantur enim ad meram vindictam, quam morientes remittere censentur. Et si ipsi, qui injuriam passi sunt, tacuerint, silentium eorum maneat semper: & non à posteritate suscitari concedatur. arg l fin. in fin. C. de revoc. donat. Ad hanc classẽ pertinet primò, Actio Injuriarum, quæ ad meram tendit vindictam, l. 2. §. 4. ff. de collat. ac proinde per litem contestationem non præparata, morte injuriati tollitur, & in successores non transit. §. 1. Inst. de perp. & temp. act. l. 1. §. 1. ff. de privat. delict. l. 32. pr. ff. ad L. Falcid. l. 13. pr. l. 15. §. 14. l. 28. ff. de injur. Oldendorp class. 7. act. 10. num. 4. Dn Carpzov. lib. 3. respons. 39. num. 3. & in tr. crim. part. 2. quest. 96. num. 25. Idq; verum est, non tantum de Prætoria, sed & de Civili injuriarum actione, ex L. Cornelia competente. arg dd. ll. De Actione ad Palinodiam, qua moribus ad recantationem illatæ injuriæ agitur, num & illa ante litem contestatam morte injuriati extinguatur & in heredes ejus non transeat, haud levis existit dubitatio. Etenim in hac Actione cessat ratio, propter quam actiones injuriarum, jure Civili Justinianæo cognitæ, in heredes & similes successores non transeunt, sed injuriati morte extinguuntur: quippe recantatoria actio non ad vindictam, sed ad famæ opinione vulgi læsæ restitutionem, sive illæ læ famæ declarationem, competit. Unde etiam à Dd. communiter ad rei persecutorias refertur actiones. Dn. Benedict. Carpzov. part. 2. tr. crimin. quest. 94. num. 15. & 62. Dn. Georg. Frantz. Exerc. 12. quest. 8. num. 7. Bachov. in not. ad π. Wesenb. tit. de injur. num. 18.

vers potius civiliter. Henr. Hahn. ad Wesenb. d. r. pag. 713. Actiones autem rei persecutoriae, etiamsi ex delicto veniant, activè tamen in successores transeunt. Atq; hanc sententiam etiam defendit, Harpr. ad § fin. Inst. de injur. num. 82. & seqq. ubi tanquam consentientes laudat Wesenb. & Halbritter. Quamvis verò illud verissimum sit, quod actiones injuriarum jure Civili competentes, heredibus injuriati ante litem contestatam mortui non dentur, sed ipsius morte extinguantur; longe tamen diversa est ratio in injuriis Senatui, Universitati & Collegio illatis, quæ per mortem unius vel alterius, aut etiam omnium, qui tempore illatæ injuriæ Universitati interfuerunt, nequiquam tolluntur; sed actiones injuriarum etiam successoribus & noviter electis, licet lis nondum fuerit cõtestata, competunt, ita ut illi injuriã collegio antea illatã vindicare possint: quippe non personis sive membris, sed ipsis collegiis injuria facta esse censetur. Ejusmodi autem collegia semper eadem permanere existimantur, licet omnes personæ mutatae fuerint. l. 76. ff. de judic. Harprecht ad §. 2. Inst. de injur. num. 39. & seqq. Dn. Carpzov. lib. 3. respons. 65. Et hæc de Actionibus injuriarum.

THES. XXIX.

Secundò ad hanc speciem Actionum, quæ tantum habent vindictæ persecutionem, etiam pertinet, Actio in factum, quæ datur adversus liberos vel liberos, qui obliti honestatis & naturalis reverentiæ, parentes vel patronos sine venia & permisso Prætoris in jus vocarunt. l. pen. ff. de in jus vocand. Nam & hæc actio competit ob injuriam personæ illatam, & tendit ad meram vindictam. Tertiò, Actio qua donator ob donatarii ingratitudinem agit ad donationis revocationem. l. 1. l. 7. fin. C. de revoc. donat. Hanc enim actionem Impp. Constantinus & Constantius ita personalem esse voluerunt, ut vindictæ & ultionis tantum habeat effectum, adeo ut nec heredi tribuatur, sed ad exemplum actionis injuriarum morte donatarii injuria affecti extinguatur. d. l. 7. & ibi Gothofred. Cujac. lib. 4. observ. cap. 19. Dn. Ioh. Otto Tabor racemat. crim. l. 1. b. 54. vid. Boccr. tr. de donat. cap. 3. num. 96. ubi ad contraria Donelli argumenta respondet. Quartò, ex Jure antiquo huc referri potest actio de moribus, l. 1. C. Theod. de doctib. quæ ita habet: *De moribus actio ultra personam extendi non potest, nec in heredem*

heredem dabitur, nec tribuetur heredi: quo etiam facere videtur §. l. 15. §. 1. ff. sol. matr. quæ tamen actio hodie constitutione Justiniani est antiquata, in l. unic. §. 5. C. de res ux. act. Vult. ad §. 1. Inst. de perpet. & temp. act. num. 17. Harprecht ad eund. §. num. 24. Bachov. disp. 5. de act. sb. 5. in fin.

THES XXX.

Enimvero si prædictæ actiones pro vindicandis injuriis & ad meram vindictam competentes, per litis contestationem præparatæ & in judicium deductæ fuerint, quin tunc in successores quoque Actoris transeant, nullum est dubium, propter textum, eundemq; expressum, in l. 13. pr. ibi: *semel autem lite contestata, hanc actionem* (loquitur autem de actione injuriarum) *etiam ad successores pertinere.* l. 28. ff. de injur. Et generaliter scribit Imp. Justinianus, in §. 1. in fin. Inst. de perp. & temp. act. *Pœnales autem actiones, quas supra diximus, si ab ipsis principalibus personis fuerint contestata, & heredibus dantur, & contra heredes transeunt.* Unde etiam Ulpianus, omnes, inquit, pœnales actiones post litem inchoatam etiam ad heredes transeunt. l. 26. ff. de O. & A. Idem quoq; in specie de Actione injuriarum recantatoria affirmat Benedictus Carpzovius, in l. F. part. 4. const. 42. def. 12. num. 5. ibi: *post litis namq; contestationem*, inquit, *res amplius integra non est, sed lites perpetuatur, ita ut possint eam heredes persequi, non tantum propter sumptus litis, sed etiam ob persecutionem palinodia & multæ.* Et tr. crimin. part. 2. quæst. 96. num. 26. ait, *quare defuncto injuriato, Reus postea condemnatus, nihilominus palinodiam præstare debet.* Etsi enim ipsemet injuriatus obierit, ejusdem fama tamen nondum interiit; quam restituere, non modo defuncti, sed & heredum interest. Expropter etiam Reus condemnari solet ad præstandam palinodiam tam ipsi defuncto, quam heredibus. Hinc Dn. Scabini Lipsienses apud eundem Dn. Carpz. d. def. 12. in fin. *Das der process von Klägern zur nothdurfft re-assumiret, und haben Klägere beklagte wegen ihres beharlichen ungehorsams/ nunmehr biß auff die hülffe erstanden und erlangte/ derowegen ist sie der Verstorbenen A. S. Und nunmehr nach derselben Tode/ klägern alsß ihrem Manne und Tochter/ wegen der gedachten A. S. zugesügten Injurien, einen öffentlichen Widerruf vor Gerichte zu thun schuldig.* Deinde si injuria defuncto post mortem, ante tamen hereditatis aditionem, fuerit illata, hereditati,

quæ interim representat personam defuncti, actio injuriarum acquiritur; quæ postea cum hereditate ad heredem transit, l. 1. §. 6. ff. de injur. At si post hereditatis aditionem facta fuerit defuncto injuria, heres suo nomine habet injuriarum actionem. Heredi enim quodammodo facta videtur; siquidem semper ipsius interest, defuncti existimationem purgare. d. l. 1. §. 4. & 6. ff. de injur. In sententia condemnatoria tamen, hoc quoq; in casu, defuncti mentio fieri solet, uti apparet ex Responso Dn. Scabinorum quod extat apud Dn. Carpz. d. quest. 96. num. 50. hujus tenoris: Hat sich R. W. L. Wittib vor sich und von wegen ihres Sohnes vber G. C. beklaget / daß er iezo gedachten ihren Verstorbenen Ehemann / in einer Dierzechen geschmähet / und gesagt / Es were ihme zu Dresden der Kopff abgeschlagen worden / da er doch daselbsten eines natürlichen Todes gestorben / etc. Ob er nuhn gleich vorgewendet / daß er solches von einem anderen zu Zeig gehöret / So ist er dennoch solches seines Verwendens ungeacht / dem Verstorbenen und seiner nachgelassenen Wittiben / und Sohne einen öffentlichen Wiederruff vor Gerichte zu thun schuldig / und mag hierüber willkürlich / mit Gefängniß / oder umb eine zimliche Geldbusse / seinen vermögen nach / in Straffe genommen werden / B R W.

THES. XXXI.

Haftenus de Transitione Actionum ex privatis delictis descendendum, respectu Actoris. Veniamus ad alterum membrum, respectu nimirum Rei, ejusdemq; heredum; an & quatenus scilicet hæ actiones adversus illos transeant: ubi distinguendum, an nondum in judicium deductæ; an verò à defuncto jamjam fuerint contestatæ. Priori casu; Certissima est Juris Regula: Actiones ex delicto descendentes ante litē contestatam adversus heredes & similes successores nō transire, sed morte delinquentis extingui. §. 1. Inst. de perp. & temp. act. l. 1. §. 2. ff. de priv. delict. ubi generaliter scribit Ulpianus: non tantum in furti, verum in ceteris quoq; actionibus, quæ ex delictis oriuntur, sive civiles sunt sive honoraria, id placet, ut noxa caput sequatur. l. 4. §. fin. & ll. seqq. ff. de alien. judic. mut. caus. fact. Ratio hujus Regulæ habetur in ultimis d. l. 1. §. 2. verbis, ibi: ut noxa caput sequatur, h. e. ut delictum, & obligatio, & actio exinde descendens autorem suum,

suum sequatur. *Dñ. Iob. Otto Tabor racem. crim. i. thes. 48.* sive ut Bachovius illam declarat: quia delictum ita afficit personam delinquentis, ut extra illam, & ab ea, relatio illa transferri & transire non possit, ne quidem in heredem & ceteros successores, qui licet succedant in universum ius defuncti, adeoque in actiones passivæ; tamen delictorum successores non efficiuntur, nec ratione delictorum, propter eorum personalitatem defunctum representant; qua representatione denegata, necessario quoque negatur ius agendi contra successores: Bachov. *tr. de action. disp. 5. th. 4.* ubi hanc regulam etiam extendit ad quasi delicta. §. *fin. in fin. Inst. de oblig. quæ ex quas delict. l. 15. cum l. seq. ff. de judic. l. ult. §. fin. ff. nauta, caup. stabul. l. 5. §. 5. ff. de his qui effud. vel dejec. Iacob. Gothofred. ad l. 38. ff. de R. l.*

THESES. XXXII.

Cum verò Actiones ex delictis descendentes non unius ejusdemque sint generis; sunt enim vel Pœnales, vel Mixtæ, vel Rei persecutoriæ; ea propter an d. Regula in omnibus locum habeat, paucis videamus. De Pœnalibus res caret contraversia; siquidem illas ad successores ante litem contestatam non transire, quam plurimi textus manifestè probant. §. 1. *Inst. de perp. & temp. act. l. 1. pr. ff. de priv. delict. l. 38. l. 111. §. 1. ff. de R. l.* Unde etiam Marcellus generaliter scribit, *heres in pœnam non succedit, l. 22. ff. de nov. oper. nunciat.* Et Impp. Arcadius & Honorius, sancimus, inquit, *ibi esse pœnam, ubi & noxia est, peccata igitur suos teneant auctores, neq; ulterius progrediatur metus, quam reperiatur delictum. l. 22. C. de pœn.* Illustratur hæc regula exemplo Actionis furti, d. §. 1. *Inst. de perp. & temp. act. l. 1. ff. de priv. delict. l. 15. C. de furt. injuriarum, l. 13. pr. ff. de injur. actionis in factum de non in jus vocand. l. 24. ff. de in jus vocand. &c.* Neq; impugnatur hanc regulam l. 3. §. 5. *ff. quod quisq; jur. in alium statuer.* ubi dicitur, quod pœna transeat in heredem, cui & ipsi propter ius iniquum à defuncto impetratum actio denegatur. Etenim respondeo, propriè pœnam non esse, si quis eodem jure utatur, quod in alterius persona æquum putavit. Deinde actiones, eo ipso dum illarum dominus novum ius constituit vel impetravit, quodammodo afficiuntur & qualitatem accipiunt, cum qua in successores transeunt. Bachov. *tr. de action. disp. 5. th. 4.* Henr. Hahn. *ad Wesenb. rit. quod quisq; jur. num. 2. versic. in heredes tamen.* Iacob. Gothofred. *ad l. 38. ff. de R. l. l. ibi: qua (actio scilicet) ad heredem suo cum novo adfecta.*

transit, & ideo heres ibi ad eandem normam formamq̃, qua defunctus redigitur in actione hereditaria exercenda: quæ utiq; ex persona heredi non immutatur. l. 2. § 2. ff. de V. O. Atq; prædicta regula, quoad pœnales actiones ampliatur, ut procedat; etiamsi ad successores aliquid pervenit. Generaliter enim passim in jure dicitur, quod pœnales actiones ante litem contestatam morte Rei extinguantur, nec contra heredes competant. l. 32. pr. ff. ad L. Falcid. d. l. 1. princ. ff. de priv. delict. d. l. 22. ff. de nov. oper. nunc. d. l. 22. C. de pœn. Quamvis enim, quod scelere quæsitum est, nec heredi relinquendum sit; sed turpia lucra etiam successoribus extorquenda sint. l. 5. ff. de calumn. l. 16. ff. quod met. caus. l. 12. ff. ad L. Corn. de falsis. l. 38. ff. de R. I. hoc tamen fieri non potest per actionem mere pœnalem; quâ tantum petitur & exigitur pœna; quæ morte rei jam est extincta, d. l. 16. ibi: licet pœna ad heredem non transeat. A quocunq; itaq; nulla exigi potest pœna, contra illum non datur actio mere pœnalis; atqui ab herede, ad quem aliquid ex delicto pervenit, nulla exigi potest pœna; ergo contra illum non datur actio mere pœnalis. Et contradictionem implicare videtur, dicere, actionem mere pœnalem competere ad id, quod nostro abest patrimonio. Aliæ enim præsto sunt actiones, quibus turpe illud lucrum ab heredibus extorquendum, tam præparatoriæ, quàm principales; puto, actio ad exhibendum, Rei vindicatio, condictio: quod in specie Ulpianus docet de actione furti; illam nimirum adversus heredes non transire, sed contra illos, quatenus aliquid vel verè vel fictè possident, actione ad exhibendum & Rei vindicatione, vel condictione furtiva agendum esse. d. l. 1. ff. de privat. delict. Idem quoq; probat Amplissimus Dn. Joh. Otto Tabor racemat. crim. 7. thes. 23. pag. 370. membr. mere pœnales. Cujac. ad l. 38. ff. de R. I. M. Lyclama lib. 1. benedict. cap. 14. & 15. ubi late hanc sententiam contra Anton. Fabrum defendit.

THE S. XXXIII.

Mixtas actiones, quæ scilicet & rei, & pœnæ habent perfectionem, passivè, h. e. adversus heredes Rei, regulariter non transire, probat §. 1. Inst. de perp. & temp. act. l. 111. §. 1. ff. de R. I. ubi prædictæ Regulæ etiam exempla mixtarum actionum subjiciuntur: ut, actio damni culpa dati, & vi bonorum raptorum. Est enim certissima juris regula, inquit Justinianus, d. §. 1. ex malef. iis pœnales actiones in heredem Rei non competere, veluti furti, vi bonorum raptorum,

rum, injuriarum, damni, injuria. Hinc Ulpianus, in l. 23. §. 8. ff. ad L. Aquil. de Actione ex L. Aquilia primò hanc ponit regulam: *sed in heredem & ceteros hac actio non dabitur* Et denique statim subjicit exceptionem; quæ regulam contrariam præsupponit, illamque in casibus non exceptis confirmat. Idem quoque comprobat l. 13. ff. de serv. corrupt. l. 2. §. fin ff. vi bon. rapt. l. 7. §. 6. ff. arbor. furt. casar. l. 111. ff. de R. I. §. 1. Inst. de perp. & temp. act. Verùm quoad has mixtas actiones regula limitatur, si aliquid ex delicto ad successores pervenerit; pro cujus quantitate etiam hæ actiones, quatenus rei persecutionem continent, ex æquitate, adversus Rei, antelitem contestatam mortui, heredes conceduntur. d. l. 23. §. 8. ibi: *nisi forte ex damno locupletior heres factus sit.* ff. ad L. Aquil. l. 5. ff. de Calumn. l. 4. in fin. ff. de incond. ruin. naufrag. Ne ipsi contra naturalē rationem, cum alterius damno fiant locupletiores. l. 14. ff. de condict. indeb. l. 206. ff. de R. I. Iohan. à Sande ad l. 38. ff. de R. I. Quando autem in ll. supra adductis dicitur, heredes hisce actionibus conveniri posse, in quantum ad illos pervenit; hoc ipsum non referendum est ad totam hereditatem; sed ad ipsum delictum; ut sensus sit, teneri heredes in tantum, seu hæctenus, quatenus ex delicto ad eos pervenit. d. l. 23. §. 8. ff. ad L. Aquil. h. e. quatenus ad eos locupletior ex delicto hereditas delata est. l. 26. ff. de dol. mal. d. l. 5. pr ff. de calumn Bachov. ad Treutl. vol. 2. disp. 30. thes. 4. lit. A. & disp. 5. de Action. thes. 4. Ad successores autem aliquid pervenisse intelligitur, non tantum si directè res ipsa per delictum quætitacum hereditate in heredem transierit: sed etiam si per consequentiam propter delictum hereditas pinguior, quàm fuisset sine delicto, ad illos pervenit: veluti si quis, dum rem furtivam consumit, de propriis rebus nihil erogavit, sed illas interim comparfit, ac ita effecit, ut plus pervenerit ad successorem, quàm aliàs perventurum fuisset, si has res furtivas non habuisset. *Schard. ad l. unic. C. ex delict. defunct. num. 21. Bachov d. thes. 4. in fin.* Nec interest, an revera aliquid ad successorem pervenit; an verò dolo ipsius factum sit, quò minus perveniret. l. 27. ff. de dol. mal. sufficitq; si semel vel momento ad primum heredem vel successorem delinquentis pervenit; licet non duravit, nec ad secundum heredem vel successorem quicquam ex hoc delicto translatum fuit. l. 17. ff. de eo quod met. causl. l. 127. ff. de R. I. Dummodo ejus facto res postea interjerit: Nam si fato, aut casu majore periit, absolve-

tur. l. 14. §. 5. & l. 18. ff. quod met. caus. Ioh. Otto Tabor. racemat. titim. 7. thes. 23, pag. 371. in fin. Sande ad d. l. 38. de R. I.

THES. XXXIV.

Sed hæc, quæ hæcenus dicta sunt, quod scilicet actiones pœnales mixtæ in successores passivè transeant, si aliquid ex delicto defuncti ad ipsos pervenit, patiuntur exceptionem in actione vi bonorum raptorum; quæ quamvis mixta sit, *princ. Inst. vi bon. rapt. §. 19. Inst. de action.* tamen singulariter à Prætorè est introductum, ut ea adversus successores, ne in id quidem, quod ad eos pervenit, detur. l. 2. §. ult. ff. vi bon. rapt. Idq; ex hac ratione: quia putavit Prætor, damnum passo sufficere condictionem furtivam; d. l. 2. Oldendorp. class. 7. act. 9. num. 4. Quam tamen rationem nonnulli ut insufficientem reiiciunt, moti l. 5. ff. de calumn. ubi Prætor nihilominus dat actionem in factum ex edicto de calumniatoribus in successores calumniatoris de eo, quod ad illos pervenit; quamvis jam antea propterea in eos sit prodita actio, nempe conditio ob turpem causam. d. l. 5. Rationem diversitatis Græci in lib. 60. Basil. tit. 17. hanc assignant: teste Vultejo ad §. 1. Inst. de deperpet. & temp. act. num. 14. quod actio vi bonorum raptorum sit famosa in eum, qui vi rapuit; & quamvis in ejus successores ipso jure famosa non sit; tamen illā nomen famosum habere, ut vel ex ipso nomine videatur quodammodò successoris fama sugillari, ac proinde illam in successores dari non debere; cum adhuc alia non famosa actio, conditio scilicet furtiva, supersit; cui potius locus esse debeat, quàm illi actioni, qua innocentis successoris fama aliquo modo sugillatur. l. 1. §. 4. l. 7. §. 1. 2. & 3. ff. de dol. mal. junct. l. 26. ff. de O. & A. Sed actionem in factum de calumniatoribus famosam non esse, & idcirco in successores dari posse. Verum quia Cujac. hanc differentię rationem colorem magis habere dicit, quàm discrimen solidum; noviter Dn. Joh. Otto Tabor aliam, & quidem hanc substituit differentię rationem: quod conditio ob turpem causam non semper concurrat cum actione in factum de calumniatoribus; sed tum demum, si sola turpitudine accipientis versetur; d. l. 5. §. 1. ff. de calumn. Conditio autem furtiva semper damnum passo & ejus successoribus concedatur. d. racemat. 7. thes. 23, pag. 372, circa fin.

THES. XXXV.

De Rei persecutoriis, quibus nimirum persequimur quod nostro abest patrimonio, l. 35. ff. de O & A. vid. Vinn. ad §. 17. Inst. de action. an in illis locum habeat prædicta nostra Regula, magna est inter Doctores controversia. Negativam sententiam amplectitur Jacob. Gothofredus ad l. 111. ff. de R. l. Arnoldus Vinnius ad §. 1. Inst. de perpet. & tempor. act. num. 2. Antonius Faber lib. 4. conjectur. cap. 1. qui de hisce Actionibus plane aliam priori contrariam construunt regulam: nimirum Actiones Rei persecutorias ex delicto venientes adversus heredes in solidum competere, etiamsi ad illos nihil pervenerit. Sed etiam in hisce actionibus regulam nostram procedere, defendit Hartman. Pistor. par. 1. quæst. 27. Bachov. tr. de Action. disp. 4. rh. 21. pag. 154. & passim in suis notis ad Wesenb. Dn. Benedikt. Carpzov. in l. F. part. 4. consil. 12. desin. 9. & lib. 3. Respons. 38. num. 7. Dn. Ioh. Otto Tabor. racemat. crimin. 7. thes. 23. pag. 373. Sand. ad l. 38. de R. l. Nam ratio, quæ harum actionum transitionem impedit, personalitas sc. delicti, quæ excluditur repræsentatio defuncti, in hisce æque ac in præcedentibus locum habet actionibus. Proinde Ulpianus, in l. 4 §. fin. ff. de alien. judic. mur. caus. fact. actionem in factum de alienatione judicii mutandi causa, licet ipsa rei persecutoria sit, in heredem tamen competere negat; nulla alia ex causa, quam quia ex delicto dari videtur, docente ipso Cajo Jcto, in seq. l. 7. ff. eod. hisce verbis: quia pertinet quidem ad rei persecutionem, viderur autem ex delicto dari. Et Imp. Diocletianus & Maximianus generaliter rescribunt, juris absolutissimi esse, successores delinquentium post litem contestatam in solidum, antea verò in quantum ad eos pervenit tantum teneri. l. un. C. ex delict. defunct. in quant. hered. Sic etiam Jctus Ulpianus: toties, inquit, in heredem damus de eo, quod ad eum pervenit, quoties ex dolo defuncti convenitur. l. 44. ff. de R. l. & in l. 3. pr. ff. de vi & vi armat. quia ex facinoribus defunctorum de eo, quod ad heredem pervenit, actio datur, sufficit enim non in luto versari eum heredem, non etiam damnum subire. Hinc Actio rerum amotarum, licet sit rei persecutoria, quia tamen ex delicto oritur, capropter contra heredes, nisi in quantum ex delicto ad illas pervenit, non datur. l. fin. C. rer. amotar. Alia exempla vide in l. 1. §. fin. l. 3. pr. & §. fin. ff. de vi & vi armat. l. 17. §. fin. l. 26. ff. de dol. nihil. vide etiam l. 16. §. 2 ff. quod met.

met. caus. Dissidentes primò moventur. *l. 9. ff. de condict. furt. §. fin. Inst. de oblig. quæ ex delict. nasc.* in quibus conditio furtiva in solidum contra heredes conceditur. *R. (1.) dd. ll.* non probare Regulam nostræ contrariam; sed tantum exemplum à regula nostra exceptum; quod non impugnat regulam, sed in casibus non exceptis illam potius confirmat. *Dn. Ioh. Otto Tabor d. Racemat. 7. th. 23. pag. 373. Sande ad l. 38. vers. verum excipitur.* (2.) Respondet Bachovius, hanc conditionem furtivam irregularem & extraordinariam esse actionem, quæ quidem ob delictum datur, sed non ex illo nascitur; ita, ut delictum tantum sit causa sine qua non, huius actionis, non autem vera causa efficiens. *Bach. in not. ad Wesenb. de condict. furt. num. 7. & rr. de Action. disput. 4. thes. 21. Henr. Hahn ad Wesenb. d. l.* Secundò moventur Dissidentes, exemplo actionis rerum amotarum, quam in solidum contra heredes dari existimant, *per l. 6. §. 4. ff. rev. amot.* ubi simpliciter dicitur, hac actione heredem quoque teneri. Atqui, inquit Vinnius *ad §. 1. Inst. de perpet. & temp. act. num. 2.* quotiescunque actio simpliciter in heredem dari dicitur, toties intelligitur dari in solidum. Verum hanc consequentiam satis infirmat *l. 13. pr. ff. de dol. mal.* ubi etiam simpliciter dicitur adversus heredem actionem doli competere; illam tamen contra heredes non in solidum, sed tantum de eo, quod ad illos ex delicto pervenit, dari, ipse Vinnius *d. l. num. 4.* & quidem recte docet, propter *l. 17. §. 1. l. 26 ff. de dol. mal.* Tertia dissidentium ratio est, quia in *l. 1. ff. de privar. delict. l. 38. l. 111. §. 1. ff. de R. l. l. 23. §. 8. ff. ad L. Aquil. l. pen. ff. de oper. nov. nunciat.* tantum fit mentio pœnalarum ex maleficiis descendentium actionum. Sed *R.* hoc propterea fieri, quia in his ratio est apertior & certior. Unius autem inclusio non statim est exclusio alterius. Et textus, id quod magis certum & apertum asserens, non illico negat, quod non ita evidens est; præsertim cum in *dd. ll.* nulla reperiatur particula taxativa. Nec credendum est, Ulpianum & Cajum in *d. l. 1. ff. de priv. delict. d. l. 23. §. 8. ff. ad L. Aquil. d. l. 111. ff. de R. l. rei persecutorias* ab illa regula excludere voluisse; cum ipsi aliter mentem suam explicaverint, in *d. l. 4. in fin. & l. 7. ff. de alien. judic. mut. caus. l. 44. ff. de R. l. d. l. 1. §. fin. l. 3. §. 1. & §. fin. ff. de vi & vi armat.* ubi idem de rei persecutoriiis affirmant. Lex itaque cum lege conjungenda. *l. unic. C. de inoffic. dot.* Quartò urgent *§. 9. in fin. Inst.*

Inst. ad L. Aquil. R. illam rationem particularem esse, nec credibile est, Imperatorem tot expressos Juris textus & rationes per illam singularem argumentationem mutare voluisse. Notum enim est, rationes Juris non semper ab universali primo concludere. *Cujac. in recit. ad tit. Cod. de quaest. pag. 1503.* Et rationes juris non semper sunt apodicticæ. *Dn. Joh. Otto Tabor d. Racemat. 7. th. 23. pag. 372. Bachov. ad §. ult. Inst. de obligat. qua ex delict. num. 3.* Quintò pro contraria regula adducit *Jacob. Gorbosfredus l. 8. l. 11. §. 3. l. 14. ff. de publican. & vectig.* Sed ibidè dominium commissarum rerum ipso jure amittitur & fisco acquiritur, qui proinde ejus persecutionem contra heredem, aut quemlibet possessorem habet. *d. l. 14.* Caterum limitatur nostra regula æque in his, ac in mixtis actionibus, si aliquid ad heredes pervenerit, in tantum enim ex bono & æquo adversus illos hæ actiones conceduntur. *l. unic. C. ex delict. defunct. & l. supra adduct. vid. Bachov. tr. de action. disp. 5. thes. 4. pag. 167. vers. nam quod tenentur.*

THESE. XXXVI.

Et hæc de Translacione Actionum ex delictis privatis descendendum, ante litem contestatam. Restat ut nunc etiam videamus, an & quatenus illæ Actiones ad successores transeant, si jam contestatæ & per litis contestationem in judicium deductæ fuerint. De quibus generalis & verissima est regula, illas tunc in solidum contra heredis transire; idq; sive sint civiles, sive prætorii & pœnales, mixtæ, sive rei persecutoriæ. *§. 1. Inst. de perp. & temp. act. l. unic. C. ex delict. defunct. l. 13. pr. l. 28. ff. de injur. l. 26. l. 38. ff. de O. & A. l. 26. l. 87. l. 139. pr. l. 164. ff. de R. I.* Nam per litis contestationem inducitur quædam quasi novatio, & ex nova causa incipit teneri Reus, *arg. l. 3. §. 11. ff. de pecul. Bachov. d. disp. 5. th. 4. Sand. ad d. l. 87. ff. de R. I.* Nonnulli ab hac regula excipiunt actionem recantatoriam, docentes, illam nec post litem contestatam transire adversus successores, sed morte Rei extingui; ejusq; hanc assignant rationem: quia hæc actio pœnalis est & famosa. Verum enim verò, huic rationi quanta vis insit, ex iis, quæ jam dicta sunt, satis superq; apparet. Nam actiones furti, injuriarum, vi bonorum raptorum, pœnales & famosas esse, indubitati juris est; illas tamen omnes post litis contestationem ad heredes transire, expressis verbis probat Imp. in *d. §. 1. Inst. de perp. & temp.*

temp. act. Imò generaliter respondet Ulpianus in l. 26. ff. de O. & A. & Paulus in l. 164. ff. de R. I. Omnes pœnales actiones post litem inchoatam & ad heredes transeunt, & Callistratus in l. 58. ff. de O & A. Sciendum est, ex omnibus causis lites contestatas & in heredem similesq; personas transire. Idē J. C. Ius Cajus: Omnes actiones quæ morte aut tempore pereunt, semel incluse judicio salva permanent. l. 139. ff. de R. I. Deinde ipsa quoq; ratio dubia, imo falsa est, quippe actionem recantatoriam non pœnalem esse, sed magis ad naturam rei persecutoria actionis accedere ostendit. Dn. Benediclus Carpozovius part. 2. quæst. 94. num. 15. & 62. Dn. Frantzke Exerc. 12. quæst. 8. num. 7. Ba. bov. ad Wesenb. x. tit. de injur. num. 18. vers. potius civiliter, & ibi H. Hahn. p. 713 & seqq. Tendit enim hæc actio non ad vindictam, sed ad damni quodammodo dati restitutionem, ut nimirum injuriæ recitando fateatur, se injustè convicium dixisse, & verbis contrariis honorem suo modo retribuat. Apud vulgum namq; injuriam passi fama non parum sugillatur. Nec magis certum est alterum d. rationis membrum, hanc scilicet actionem esse famosam. Contrarium enim docet Wesenbecius consil. 22. num. 25. Mynsing consil. 60. num. 15. Harprecht ad § 10 Inst. de injur. num. 109. & seqq. Dn. Carpozovius part. 2. præf. crimin. quæst. 94. num. 65. cui & nos ad stipulamur. Ea propter cum Dissidentium ratio nec vera nec concludens sit; & in l. 58. ff. de O & A ac aliis juris textibus generaliter dicatur, lites contestatas ex omnibus causis in heredes, qui in locū defuncti succedunt, illumq; repræsentant, & cum ipso una eademq; persona esse censentur, l. 34. ff. de judic. Nov. 48. in præfat. transire; affirmativa sententia juris analogiæ haud videtur contraria; secundū quā etiā pronunciavit Facultas Juridica Lipsiensis; hisce verbis: Daß beklagte an Stadt und von wegen ihres Vaters und respective Großvaters vor Gerichte klägeren der beklagten injurien halben einen öffentlichen Widerrufszuchum / 100. Gulden straff zu milden sachen anzuwenden / zuertrichen / auch die Vnkosten auff vorgehende liquidation, und Richterliche moderation zu erstatten schuldiz / V. R. W. apud Dn. Christoph. Philipp. Richter. part. 1. decis. 55. num. 22.

THESES. XXXVII.

Sed hoc, quod dictum est, omnes sc. Actiones ex delictis privatis descendentes post litem contestatam in successores transire,

ire, intelligendum est de actionibus civilibus, ad pœnam ipsi parti applicandam intentatis; In qua omnes Interpretes consentiunt. Si verò ob delicta privata agatur criminaliter, communiter hoc ipsum indistinctè negant; prout videre est apud Farinacium *prax. crim. lib. 1. tit. 1. quest. 10. num. 54. in princ.* Sed cum nulla appareat ratio diversitatis quoad hanc causam, inter pœnam fisco applicandam, & pœnam applicandam parti, ac *l. 26. l. 58. ff. de O. & A. l. 139. pr. l. 164. ff. de R. L.* generaliter loquantur: verissimum existimo, eo etiam casu, ubi criminaliter agitur ad pœnam pecuniariam fisco applicandam, actiones ex privatis delictis descendentes, post litem contestatam in successores transire; quo etiam facit præjudicium præcedenti thes. adductum. Cæterum si criminaliter ad pœnam corporalem delinquenti infligendam ageretur, lis, quantumvis contestata, in successores non transit, sed cum persona delinquentis simul expirat: quippe ejusmodi pœnz corporis afflictivæ nullo tempore ad successores transeunt. *Sichard. ad l. unic. C. ex delict. defunct. num. 6 & 7.*

THESES. XXXVIII.

Illud autem, quod post litem contestatam Actiones ex delicto in successores transeant, non tantum procedit, si vera; sed etiam si ficta litis contestatio intercesserit, h. e. si lis pro contestata habeatur. Nam si per subterfugia & cavillationes Rei steterit, quò minus is litem contestetur, & ita per calumniam differat litis contestationem, lis, quoad hunc effectum transmissionis actionum, pro contestata habetur, atque in successores continuatur: modò Actor in mora non fuerit, sed ex sua parte omnia fecerit, quæ pertinerent ad litem contestandam. Iniquum enim esset, ut fraus atque calumnia adversarii noceret ei, qui in persequendo jure suo diligens ac vigilans fuit. Et huc facere videtur *l. 33. ff. de O. & A. l. 10. §. 2. ff. si quis caus. in judic. sistend.* Pluribus hoc demonstrat Hartm. Pistor. *part. 1. quest. 27. num. 7. & 8. Farinac. d. quest. 10. num. 51. Dn. Carpzov. lib. 3. Respons. 39. num. 21. & in l. F. part. 4. const. 12. defin. 9. num. 7. & 8.* Et hoc ipsum eò magis procedere existimat Sichardus *ad l. unic. C. ex delict. defunct. num. 16. & 17.* si Judex in bona, ita contumaciter & malitiosè absentis, missionem ex primo decreto fecerit. Hoc enim primum decretum dicitur habere vim litis contestatæ, ita, ut mortuo isto

Dob. Otto Tabor Racemat. crim. 7. thes. 23. pag. 372. & seq. Gail. 1. de pac. publ. cap. 20. num. 22. Fachin. lib. 9. controv. cap. 5. Iul. Clarus lib. 4. recept. sentent. quest. 51. num. 16. Farinac. d. l. 1. tit. 1. quest. 10. num. 60. Georg. Schults ad §. 1. Instit. de perp. & temp. act. lit. C. Atque hanc Juris Canonici dispositionem, etiam in foro civili receptam esse scribit Vinnius ad d. §. 1. Inst. de perp. & temp. act. in fin. Quod tamen non sine ratione in dubium vocat Dn. Iohann. Otto Tabor d. l. & Racemat. 1. th. 64.

THESES. XL.

Effectus hujus Transitionis est, ut Successores æque ac illi, quibus successerunt, translatis actionibus agere & conveniri possint. Adeo, ut licet lis jam cœpta, ipsæq; actiones in judicium fuerint deductæ, de jure tamen communi nulla litis reassumptio necessaria sit. Nam instantia in causis civilibus cœpta morte litigantium non extinguitur, sed activè & passivè in heredes transit. *l. 33. ff. de fidejussor. l. 78. §. penult. ff. ad SCtum Trebell. l. 34. ff. de judic. l. 58. ff. de O. & A. Gail. lib. 1. obs. 190. num. 6. Dn. Benedictus Carpzovius lib. 3. tit. 2. Respons. 24. num. 1. & seqq. Cass. Ziegler in comm. conclus. ad auream praxin. Nicol. Calvot. in pralud. de instantia in genere num. 15. Quod tamen moribus est mutatum. Hodie enim in praxi receptum est, ut heredes ad continuationem processus non admittantur, priusquam litem legitimè reassumpserint. de quo vide Gail. d. l. 1. obs. 109. num. 9. Dn. Carpzov. d. Respons. 24. num. 5. ubi simul disputant an bene vel male hoc factum sit. Expressè enim scribit Gail. d. l. melius fore, magisq; litigantibus expedire, si hæc ipsa processum reassumendi necessitas illis remitteretur. Ita autem Actiones in Successores transeunt, ut regulariter in personis successorum qualitates obligationum & exinde descendendum actionū nō mutantur. *l. 2. §. 2. ff. de V. O. paucis casibus exceptis, de quibus vide l. 1. C. de hered. tut. & curat. l. 4. ff. de magistrat. conven.* Sic etiam actiones licet sua natura famosæ sint, heredes tamen & similes successores illis condemnati infamia non notantur. *l. 6 §. 1. ff. de his qui notant. infam.* Sed de hisce & aliis pluribus agere, temporis ratio & instantis peregrinationis necessitas non permittit. Hæc itaq; impreseniarum de nobilissima & per totum jus.*

dispersa Transitionis Actionum materia
dixisse sufficient.

DEO SOLI SIT LAUS ET GLORIA IN INFINITA SECLA.

I.

PActum personale à principali Debitore initum regulariter prodest fidejussori.

II.

Libellus alternativus subsistit quando ex l. 2. C. de rescind. vendit. agitur; etiamsi laxio fuerit enormissima.

III.

In actione hypothecaria libellum alternativum admitti contra ejus naturam à Dd. asseritur.

IV.

Non omnes, quibus competit actio realis ad res immobiles, à satisfactione sunt immunes.

V.

Exceptio non numeratæ pecuniæ non tantum in mutui; sed in aliis quoque confessionibus locum habet.

VI.

Doctor Juris, qua Doctor, instrumentum conficere nequit.

VII.

Juramentum ab Actore deferri potest Reo, licet nihil ab eo adhuc sit probatum.

F I N I S.

